

Revelesen

Ru kagin

¹ Gubak mi ru en mianuk lo yen a. Ago man Jesus Kristus inſen kuai te iganeg ilasa ya. Anut sen ru en Jesus ikubiai panig an lo inſ inanen urat tamol adi, melmel murnap ririanan ilasa san, amaiak niſedi wo ikubiai pidinai dop duloſ a. Ago dugo Jesus ru en kuai ipani wo inanen eſel idinig, ru en isini ipalug ſai Jon, Jesus anen urat tamol ipanag a. ² Nai Jon, mel fidian malag ſutun lo ſile amaiak, buk en lo ſgire ya. An man Anut san ru agod ru rumok Jesus Kristus ikubiai panag a. Aria, ſai igo ſabol da, ru en man rumok a. ³ Ru en man profet ru, Anut san nag ipalu ya. Talpein ta inſ ru en aenta luluſad lo isuti dan, inſ Anut san bar inane wa. Agod tamolpein a talpein an awan duloſ go duri dupani dan dam, Anut san bar diſane wa. Man dugo, Kristus san ru nuſon ifu san saen sumeik ipalu la ya.

Jon Kris midaeſ seven sad na ru igire ya

⁴ Nai Jon, ſai ru e ſgire yen man anſ Kris tamolpein nek a Kris midaeſ seven, tan Esia lo amado dan anſami a.

Anut gamu imado dak, gubak mi imado ya, agod murna dop ipalu wa. Inſ ka ilon ipanaſ dop, ilo maror amado san ipanaſ a. Agod ur seven Anut san kalik naon na dumado dan, inſ dam ilo panek, agod ilo maror amado san ka dupanaſ a. ⁵ Nek ago mi, Jesus Kristus dam, ilon ipanaſ dop ilo maror

amado san ka ipanaj a. Inj Anut san ru itaot geig ibol ilasa da. Inj mi tamol malan te geig mutou* lo imasa ya. Agod inj dam kinj adi e tan na dumado den sad Tubun a.

Inj id ninjed o tubun mi imat da, agod injanen dar lo idsad aupasek fidian mi isasi panad an lo, muruan tiag kawan tumado da. ⁶ Agod inj itumanad go injsan kagin panek paen na tumado da. An lo man Kristus id idirad go injsan Taman Bai san pris adi igo wonj gamu tumado da. Aria, id saen fidian lo Jesus yanjan tabisap yau a. Inj mi saen pempem melmel fidian itirnai san dabai aman da ya. Idsad per panek pempem nek ago yen yau a. Rumok.

⁷ Ale. Inj keit lo timtaen titinjaem imado dugo ipalu da!

Ago dop tamolpein fidian mi injsed malad lo dile wa.

Tamolpein a gubak mi yu nam inj dusue yan dam dile wa.

Gugoi fidian a tan titin fidian lo dumado dan, Kristus ipalu dop dilep,

an lo ilod tubun mi saian pe tinañ tubun mi geig digane wa.

Nek a, rumok!

⁸ Anut igo ibol, “Ñai mi imug ñumado dak, agod ñai mi murna ñumado da. Ñai gubak mi ñumado yak, ñai gamu ñumado da, agod murna dop ñupalu wa. Ñai mi dabai fidian amag da ya.”

Jon inj Kristus ile ya

⁹ Ñai Jon, ñai anjanem teimi, ñai anj da Jesus san warou lo tumado da, agod ñai anj da tutumanig id sisem muruan da madai da tisini da. Ñai anj

* **1:5:** Nitou

da Kristus san kagin panek lo tumado da, agod id fidian mi tatur dabai dugo muruan tisini na ya. Nai Anut san ru, agod ru rumok a Jesus ikubiai panad an dam nabol ilasa na ya. An ninen o nai dukudag go subanek tamol on n̄aug, nui ta yan̄an Patmos dubol dan te n̄umado se ya. ¹⁰ Ubou nal ta lo, Awan Urgun in̄ n̄aisag ilo sou itirni dugo, tamol ta awan dabai geig ak, nek ibol barag san lilañan igo won̄, nai patug na iwagin̄ dugo n̄aloñ a. ¹¹ Awan an irupaiañ go ago ibol, “Mel fidian e ule den man, buk lo girep, Kris midaeñ seven an sad na ganep yau a. On̄ ka ganep Kris midaeñ o taun Efesus, Smerna, Pergamum, Taiataira, Sardis, Filadelfia, agod Laodisia na yau a.”

¹² Agog nai tamol enti n̄aisag na in̄in̄eñ dan n̄ile wo n̄adañsa man, lam gol seven an dutur dugo n̄eil a. ¹³ Agod nai tamol kisaek lam an luluñad lo itur dugo n̄ile ya. In̄ nek ibol “tamol nanun on̄ a.” In̄ kulos milaeñ ak iganeñ n̄ien ibuluwi a, agod in̄ let gol titire na igane ilubani a. ¹⁴ Gumuran roun man milkouk geig a, nek ibol sipsip fufulun on̄, tia, timtaen milkouk ak igo won̄ a. In̄san malan man nek ibol yai ided dak ago mi a. ¹⁵ In̄san n̄ien man milkouk geig a, nek ibol bras yai tubun ak fo dumarig san ilalañ ad ided dak igo won̄ a. In̄ awan n̄aloñ ak san lilañan man, nek ibol dog kuror ak lo you isokalik dop san lilañan tubun geig ak igo mi a. ¹⁶ In̄ patui seven banin won̄ ak ate yabi da. Agod sabiri milaeñ di malan uraru luon geig a, in̄ awan lo yen dugo ipalug ilasa da. Agod in̄san naon man ilalañ geig a, nek ibol ad san ilalañ dabai ak ago mi a.

¹⁷ Nai in̄ n̄ile dugo n̄ien fun na sumeik mi tamol

imat ak igo won ɲau ɲadu ya. Ak man in banin won ak iwateg ibiag dugo irupaiag, “On ta urer na wa. ɲai malan te geig ɲumado dak, agod murna geig ɲumado da. ¹⁸ Agod ɲai tamol kumaen san ɲumado da. Gubak mi ɲai ɲamat la ya, ak gug ule, gamu ɲai kumaen pempem ɲumado da. ɲai materɲ san ki agod tamol dumat la yak sad abedi san ki dam ɲabi da.

¹⁹ “Ago yak niɲen o on melmel e ule den, nek melmel gamu e yen den, agod melmel murnap dilasa wak dam, buk lo gire idu wa. ²⁰ On gubak mi patui seven an banig won ak ate dien dugo wil la ya, agod lam gol seven an dam mi a. En man in mel mianuk a, agod fun man igo ya: patui seven en man, Kris midaen seven amaiak sad enel adi, agod lam seven an man Kris midaen seven amaiak in sedi a.

2

Ru Efesus Kris midaen sad na yau a

¹ “On ru ta girep taun Efesus na Kris midaen sad enel malan te yan san na yau a. Ru man igo ya.

Tamol enti patui seven banin won ak ate yabig, lam gol seven luluɲad lo turen yabi dan, ru en an sam na iganeg ipalu da. ² An Kris midaen, ɲai an anem kulob fidian, an anem urat dabai ak, agod muruan lo atur sakar na yan ɲalon la ya. ɲai ɲalon ak, tamol saiadi ak niɲedi wo ayalis da, agod tamol ensauta a in sed aposel ago dubol dak gug in aposel tia yan, bitinaek lo adiraig an lo in kuai te dilasa man in sewak tamol adi mi a. ³ An muruan tubun mi dupanan bo man atur dabai dugo, ɲai yan jag

ninjen o madai wei mi asini na ya, agod an lo dam an ta ayalis na ya.

⁴ Ak gug naj an ninjemi wo ru igo yak amag da ya, saen an imug ilom rumok an lo an naj o tubun mi amat se ya, ak gug gamu saen en lo man naj o tubun mi ta amat na da. ⁵ An au adu geig an ninjen o ilom isou wa. An gidad ilom ibilisa wa, agod kagin naok imug mi agane se yan ago mi fon agane wa. Ak gug an ago ta agane na dop man, naj an sam na nupalup, lam a inanen aben ate itur dan nupasip nabal yau a. ⁶ Ak man an kagin uyan ak kisaek amam da ya. An tamolpein warou a yanad Nikolaitan dubol dan sad kagin ninjen o ilom tubun mi saian da, an lo an naj da inaned kagin an ninjen o ilod kisaek a.

⁷ Aria, talpein enti kududon da dop man, in gidad Awan Ur ru e Kris midaen irupidai den ilon uyanan a. Talpein enti yu igane itout dop, naj dabai nupanip an lo, kumaen san ai ate anan inanep yani wa. Ai an Anut san abi yan an Paradais dubol dan, ante isa da.

Ru Smerna Kris midaen sad na yau a

⁸ “On ru ta girep taun Smerna na Kris midaen sad enel malan te yan san na yau a. Ru man igo ya.

Tamol enti gubak mi imado yak, agod murna dam imado wan, agod gubak mi imat ak, gug gamu kumaen imado dan, ru en an sam na iganeg ipalu da. ⁹ Naj an sam na muruan di, madai dam ilasa yan nalon a. Agod naj nalon ak man, an filiam tiag amado da. Ago bo man an filiam amam da geig a. Taida mi, tamol aenta dam an ninjem o uf ru dubol dan nalon a. Tamol an in Juda sadi ak ago

dubol da, ak gug in Juda sad tia geig a. In Satan san midaen mi a. ¹⁰ Saen kitekan dap an muruan asini wa, ak gug an ninen o an gidad ilom ta irer na wa. Nai nurupaian da, Satan ago igane dop, in tamol aenta an lulanam lo subanek lo idirai a, ago dop an lo an ikubianan a. Saen an lo dop an nal 10 muruan in madai da asini wa. Gidad on dufuno umat a, onane ilo rumok nai lo yan wabi dabai dop yaup umat a. Ago dop man, kumaen pempem mi mado san kob nupano wa.

¹¹ Aria, talpein enti kududon da dop man, in gidad Awan Ur ru e Kris midaen irupidai den ilon uyanan a. Talpein enti yu igane itout pe, in maten murnai an irinani dop madai an ta ile na wa.

Ru Pergamum Kris midaen sad na yau a

¹² “On ru ta girep taun Pergamum na Kris midaen sad enel malan te yan san na yau a. Ru man igo ya.

Tamol enti sabiri milaen di malan uraru luon geig ak yabi dan, ru en an sam na iganeg ipalu da.

¹³ Nai aben a an amado dan nalon uyanan a. Satan san kalik ante yen da. Ak gug an naisag yanag abi dabai da, agod an nai nineg o ilom lo rumok a, an sam ilo rumok an tamolpein naod na ta atot na ya. Tamol Antipas amaiak naisag a, an sam panu nek a Satan imado dak ate in anen ilo rumok nai o ibol ilasag ninen o dufunig imat a. Ak gug saen an lo dam an nai patum ta apanag na ya.

¹⁴ Ak man nai an ninemi wo ru aenta amag da ya. An Pergamum na amado dan lulanam lo, tamolpein aenta in tamol a Balaam dubol dan san kagin diabi da. Balaam san kagin man igo ya.

Gubak mi kagin sewak Balak ikubiai panig, an lo Isrel tamolpein irawai dugo, aupasek lo diau dudu ya. An lo Balak Isrel adi iduduwaig, mudan a gob adi tubud sewak yai digane pidinai se yan diani dugo, jeit kagin dam digane se ya. ¹⁵ Nek ago mi, tamolpein naok ago yak ta an lulunam lo dumado da, in warou a Nikolaitan dubol dan sad pitejanek duri dupani da. ¹⁶ Ago yak ninen o an ilom ibilisa wa. Tia dop, nai gugurut nam an sam na nupalup, sabiri e awag lo yen den, ate tamolpein an nafu wa.

¹⁷ Aria, talpein enti kududon da dop man, in gidad Awan Ur ru e Kris midaen irupidai den ilon uyanan a. Talpein enti yu igane itout dop, nai mana a mianuk lo yen dan kitek in nupanip yani wa. Mana an Isrel adi tan kawan ak lo diani se ya, ak gug gamu mianuk lo yen da. Agod nai pat milkouk ak ta dam nupani wa. Nai pat ante yanjak foun ak ta ngire wa, ak man yanjak an tamol sen ak ta fun ilon san tia ya. Tia, talpein a pat inane dan mi yanjak an fun ka ilon a.

Ru Taiataira Kris midaen sad na yau a

¹⁸ “On ru ta girep taun Taiataira na Kris midaen sad enel malan te yan san na yau a. Ru man igo ya.

Ru en man Anut Nanun an sam na iganeg ipalu da. In malan ided dak yai balen igo won a, agod nien dam ided da, nek ibol bras dusosisi uyanan ak igo won a. ¹⁹ Kulob fidian an agane dan, nai nalon la ya. Nai nalon ak, an tamolpein ninedi wo tubun mi amat da. Agod an nai nineg o ilom lo rumok da. An urat naon sensen ak lo aenta abinawai o agane da. An bo muruan wei mi an lo ilasa dugo atur

dabai da. Agod ɲai ɲalon ak, kulob e gamu agane den, kulob a imug mi agane se yan iriɲani a.

²⁰ Ak man aɲ niɲemi wo ɲai ru ta amag da ya. Aɲ pein Jesebel alefuni dugo iɲ aɲ da amado da. Pein an iɲ profet ak ibol da. An lo iɲ ɲaineg Kris tamol adi irawai dugo jeit kagin lo diau dudu da. Taida mi, iɲ mudan a tamol aenta tubud sewak adi yai digane pidinai dan ka diani wo maɲau ipiteɲani da. ²¹ Iɲ ilon ibilisa wo ɲai ilog yen da, amaiak niɲen o saen subuɲan taidam ɲupani a. Ak gug ilon ibilisap jeit kagin ibisei wo man imoi a. ²² An niɲen o ɲai pein an subam lo ɲiganep, madai tubun ak iɲane wa. Ago dop tamol adi dida jeit digane na yan, pein an san kagin saiak ta dibiseip ilod ta ibilisa na tap, an niɲen o ɲai muruan tubun ak, agod madai tubun mi ɲupidinai a. ²³ Agod pein an iɲanen warou adi dam ɲafup dumat a. Ago dop an lo Kris midaeɲ fidian duloɲ ak, ɲai man tamol ema ya: ɲai aɲ ilom ilon lo, agod aɲanem kankan lo dam ɲukubianip aɲanem bunun mok mi ɲile uyanan a. An niɲen o kulob dugo agane dan iɲsan naon ɲai aɲ kisaek kisaek ɲupanaɲ a. ²⁴ Ak gug gamu aɲ tamolpein aenta, Taiataira san Kris midaeɲ lo amado dan, pein an san piteɲanek ta ari apani na dugo, Satan san melmel imianuk geig go yen dan dam ta aloɲ na dan, aɲsam na ru en ɲabol ilasa da. Aɲ muruan subuɲan taidam asini wo ɲai ta ɲududuwan na wa. ²⁵ Aɲ melmel fidian nek a abi dan, gidad abi dabai dop na wa. Ago mi agane dop yaup saen ɲai ɲamul ɲupalu san ilasa wa.

²⁶⁻²⁷ Talpein enti yu igane itout dop ɲaisag ilobol mi iri ipani dop yaup saen wadan idu wan, ɲai

igo n̄urupei da. Bai wagen lo dabai n̄in̄aneg, an lo tamolpein n̄itirnai ak ago mi, talpein an n̄ai dabai n̄upanip an lo in̄ dam tan en san tamolpein itirnai a. Anut san ru ago ibol,

‘In̄ itirnai dabai dop kin̄ san makud ain nam ifu irubai a,
nek ibol tamol bod igufutep kilaken kitiktik ilasa dak igo won̄ ago igane wa.’

²⁸ Agod n̄ai patui tidom lom mi mok ilasa dan n̄upani wa. ²⁹ Aria, talpein enti kududon da dop man, in̄ gidad Awan Ur ru e Kris midaen̄ irupidai den ilon̄ uyanan a.

3

Ru Sardis Kris midaen̄ sad na yau a

¹ “On̄ ru ta girep taun Sardis na Kris midaen̄ sad en̄el malan te yan san na yau a. Ru man igo ya.

Tamol enti Anut san Ur seven aman da dugo patui seven dam iburou dan, ru en an̄sam na iganeg ipalu da. N̄ai an̄ kulob fidian agane dan n̄alon̄ la ya. Tamolpein an̄ n̄in̄emi wo igo dubol da, ‘midaen̄ en malad kumaen̄ dumado da,’ ak gug an̄ amat pasik a. ² An̄ gidad kumaemi amasa dop lo an̄anem kulob kisaek kisaek dumat o sumeik dan dabai apidinai a. Man dugo, an̄anem kulob fidian n̄ukubianig n̄ile la ya, an n̄in̄en o kulob amaiak n̄aisag Anut malan lo ta itaot na yak ago kuai n̄upani a. ³ Amaiak n̄in̄en o ru a gubak mi alon̄ dugo an̄ane yan, ilom isou wa. An ari apani dop ilom ibilisa wa. An̄ n̄ion̄ mi abi dop ta amasa na tap, n̄ai gumagam tamol igo won̄ an̄sam na n̄upalu kisaek on̄ a, ak gug saen dugon te n̄ai n̄upalu san man an̄ ta alon̄ na wa.

⁴ Ak man anjanem midaen Sardis na yan lulunad lo tamolpein kisaek kisaek inaned kulos nun ta dupani na ya. Tamolpein an in kulos milkouk ak didirip nai dida mator a, man dugo, in ago digane san man idaisuda ya.

⁵ Talpein enti yu igane itout dop, in dam ago mi kulos milkouk ak igane wa, agod nai kumaen san buk lo yanjan ta nusuas na wa. Tia, naisag Bai naon na talpein an yanjan nabol ilasa wa, agod insan enel adi naod na dam yanjan nupate wa. ⁶ Aria, talpein enti kududon da dop man, in gidad Awan Ur ru e Kris midaen irupidai den ilon uyanan a.

Ru Filadelfia Kris midaen sad na yau a

⁷ “On ru ta girep taun Filadelfia na Kris midaen sad enel malan te yan san na yau a. Ru man igo ya.

Tamol enti a gun an, agod kagin rumok ak aman da yan, ru en anjam na iganeg ipalu da. In Dawid san ki yabi da, an ninen o dalawan dugon ipasi man, talpein ta ifutani san tia ya, agod dalawan a ifutani dan dam talpein ta ipasi san tia geig a. ⁸ Nai kulob fidian a an agane dan nalon la ya. An ninen o ale, dalawan ta an naom na nai nupasig ikasap go yen da, amaiak tamol ta ifutani san tia ya. Ak man nai nalon ak igo ya. Anjanem dabai man tusan a, ago bo man an naisag ru ari apani na ya, agod an tamolpein naod na nai yanag ta atot na ya. ⁹ Tamolpein a Satan san warou lo dilasa yan, in Juda sad warou lo yak dubol da, ak gug an rumok tia ya, in sewak tamol adi. Nai tamolpein an niriiaip anjam na dupalu dop niem fun na turud dusoluwi wa. Agop nai in nusodudunaip insiganed awad lo, nai an ninemi wo tubun mi njamat ak ago

dubol a. ¹⁰ Gubak mi ηai ru en ηurupaianη a, an muruan fidian lo atur dabai a. An ru an ari apani na ya, an ninen o ηai an ηubargirananη a. Kubianek saian geig ak ipalu da, an lo tamolpein aben titin fidian lo yan ikubianai wo ilasa wa. Ak gug saen an lo ηai kagin ηupananη dop muruan an irinananη a.

¹¹ Saen ηai tan na ηamul ηupalu wan ipalu sumeik la ya. Melmel fidian anη abi dan man, gidad abi dabaip yen a. Kabelan talpein ta anηanem urat naon igam banau. ¹² Talpein enti yu igane itout dop, ηaisag Anut san ubou ab lo inη bag tamol igo wonη ηuguni wa. Ago dop inη Anut san ubou ab ibiseip kuai te ta ilasa na wa. Tia geig a. Agod ηai ηaisag Anut san yanηak inη tinin fo ηigire wa. Agod ηaisag Anut san taun tubun ak man, Jerusalem foun a, amaiak san yanηan dam, agod ηaisag yanηag foun ak dam, inη tinin fo ηigire wa. ¹³ Aria, talpein enti kududon da dop man, inη gidad Awan Ur ru e Kris midaenη irupidai den ilonη uyanan a.

Ru Laodisia Kris midaenη sad na yau a

¹⁴ “Onη ru ta girep taun Laodisia na Kris midaenη sad enel malan te yan san na yau a. Ru man igo ya.

Tamol enti yanηan ‘Rumok’ dubol dan ru en anηsam na iganeg ipalu da. Inη mi ru rumok san tamol, pempem Anut san ru an itaot geig ibol ilasa da. Melmel a Anut igane yan tamol enti a yanηan ‘Rumok’ dubol dan mi sad Tirnek Tamol imado da. ¹⁵ Anη kagin fidian a agane dan ηai ηalonη la ya. Anη ta bubarum na dak, agod anη ta wananan na da. ηaisag ilog yen dak man, anη wananan amado wa, tia dop, anη bubarum mok amado wa. ¹⁶ Ak gug anη wananan geig tia ya, agod anη bubarum mok dam

tia ya. An wananan tusan mi a. Ago yak niñen o awag lo ñai an ñugulanañ o da. ¹⁷ Man dugo, an igo abol da, mañ moni wei mi, agod biouñ naok fidian dam amam da ya, an lo mel ta lo katuk am man tia ya. Gug ñaisag leil lo man, an saiami geig a, tamol fidian an niñemi wo ilod ka imuñanañ a, an filiam tia ya, agod malam itau di taem kawan amado dan, an an fidian ta ale alon na ya. ¹⁸ Amaiak niñen o ñai kankan emaiak ñupanañ o da. An ñaisag na apalup melmel ibunawañ san ka adad a. An gol yai lo dumarig itaotan ilasa yan adad dop man, an filiam mok amam da wa. Agod an kulos milkouk ak tinim atuani san adad dop man, tamol adi an taem kawan amado dan ta dile na wa, an lo miai ta ifunañ na wa. Taida mi, an marasin malam te abubuni san adad dop man, abañ ka ale wa.

¹⁹ Tamolpein a ñai ilog ñupidinai dan man, ñai ru lo kududod ñabip bu dam ñupidinaip lo inaned kagin naok naok ñukubune wa. Amaiak niñen o an ilom ibilisa dop ñaisag dal ari apani san niñen o dabai agane wa. ²⁰ Alon ak, ñai dalawan te ñatur dugo ñuwagin da. Ago dop talpein ta ñai awag ilon pe dalawan ipasi tap, ñai ñiladup in da mumado wa. Ante ñai in da anañ mani wa.

²¹ Talpein enti yu igane itout dop, ñai in dabai ñupanip an lo in ñai da ñaisag kalik fo mumasip mumado wa; nek ibol gubak mi ñai dam yu ñigane itout go, Bai san kalik fo ñumasig in da mumado yak ago mi a. ²² Aria, talpein enti kududon da dop man, in gidad Awan Ur ru e Kris midaeñ irupidai den ilon uyanan a.”

4

Kumaen panu lo Sipsip Nanun san ubou leil

¹ Murnag najai malag yau man, kumaen panu na dalawan ta ikasap lag yen dugo njile ya. Ago man tamol en gubak mi, barag igo wonj awan tubun mi ibob dugo njalon man, gamu igo ibol da, “Onj ente palup sida dop man, najai melmel murnap ilasa san njukubiaip ule wa.” ² Agog Awan Urgun tuon aman da njaisag na ilasag malag njutun ile kisaek onj a. Malag yang kumaen panu na kinj san kalik ta itur dugo njile yan fufo, Tamol ta imasig imado dugo njile ya. ³ Tamol en injsan rafulei man kadabog a, nek ibol pat ta yanjan jaspas dubol dan, agod san daran ak dam nek ibol pat ta yanjan konilian dubol dak igo wonj a. Galbaob kisaek kinj san kalik ilubanig, injsan rafulei man mum* mok, nek ibol pat a yanjan emeral dubol dan igo wonj njile ya. ⁴ Kinj san kalik fun te kalik aenta 24 dutur dulubani a. Matu gurman adi nunod 24 kalik an fufo dumasig dumado da. Matu gurman adi an man inj kulos milkouk milmilae ak didiri dugo, kitikat gol lilit aman da yak kabunjad fo didirig dumado da. ⁵ Kinj san kalik fo na weil irafule dugo njile ya, agod lilijan funfun dilasa dugo weil tubun mi ilinjan dugo njalon a. Kalik malan te yan naon na man sul seven dided dugo dutur se ya. Sul seven an man Anut san Ur seven ama ya. ⁶ Agod kalik an naon na man, mel ta njaisag leil lo nek ibol beig galas igo wonj, agod you malin malan sinjaokan ak igo wonj a.

Ago dugo melmel iwoiwo kumaedi dumado dan, inj kinj san kalik dulubanig dutur da. Inj kalik

* **4:3:** Grin

a sukurun iwoiwo yan da dusatuanig dutur dugo kalik disasunani da. Injad maladi man wei mi geig, naod na patud na tinid fidian injanefute ya. ⁷ Mel malan te kumaen imado dan man nek laion on a. Mel taida mi kumaen imado dan man, makau tamol ak on a. An tinin te taidam, kumaen imado dan man naon nek tamol on a. Agod mel a murna geig kumaen imado dan man, bog ta irou dak igo won a. ⁸ Melmel iwoiwo e kumaed dumado den, in anen anen subarid 6 amad da ya. Agod maladi man wei mi geig, tinid ibuluwi yaug, subarid paen na dam yen da. Ago dugo in ad tidom bar en pempem igo diabi da.

“Tubud Anut in dabai fidian aman da ya,

in gun di gun agod gun geig a.

In gubak mi imado yak, gamu imado da, murna dop man ipalu wa.”

In yaes bilabal amad tia ru en dubol da. ⁹ Melmel e kumaed dumado den, Tamol a kin san kalik fufo imasig kumaen pempem imado dan ninen o, saen pempem mi uyasusai digane da. An lo na yan an diabisa dugo, ilo uyan dam dupani da. Agod nal fidian melmel iwoiwo kumaed dumado dan, ago mi digane da. ¹⁰ Saen ago digane dan lo, matu gurman nunod 24 yan, in Tamol e kin san kalik fo imado den naon na turud dusoluwi da. Agog in Tamol nek a pempem mi kumaen imado dan in ubou an dile da. Ago dugo in siganed kitikat gol aman da yan dupasi dugo, kin san kalik naon na sumeik mi diabibol idu dugo, bar igo diabi da.

¹¹ “Tubun ak, on mansama Anut, on girager ama da yak, on yan lak na geig ak, agod on dabai ama da ya.

An lo tamolpein kagin amaiak niñen o per dupano wa, agod in ago digane san man on idaisuda mok a.
 Man ata wo? On mel fidian onsigane ulon ak lo gane ya,
 an lo mel fidian ganeg dilasa yan gamu on tuo lo mi dien da.”

5

Buk dufutani ak Sipsip Nanun awan ipasi a

¹ Tamol en kin san kalik fo imasig imado dugo, tuon won ak ate buk ta yabi dugo nile ya. Buk en man nek ibol pepa milmilae ak dubuleg dufou yak igo won a. Pepa an man girek naon ananae mi dien da. Pepa an dulumu yaug titin seven an lo, kendel san guren nam dufou dababai dugo kendel san guren seven an fidian mi tinid fo na kob ta digane ya. ² Ago man nai enel ta dabai aman da geig ak, awan tubun mi igo isasaig iwagin dugo nile ya. “Tamol idaisuda yak enti, in kendel san guren e lo buk dufoug yen den ka ifulalep ipasi waki?” ³ Ak gug tamol ta in ka buk en awan ipasip, ilon lo girek isuti san tia ya. Kumaen panu lo, tan na, agod tan paen na dam ate aban an diabi se yak gug tamol ta idaisuda yak dile man tia ya. ⁴ Saen tamol ta in buk en awan ipasip, ilon lo ru isuti san dile man tia dugo nai nile man, tina tubun mi nigane da. ⁵ Agog matu gurman ta igo irupaiaag a, “On ta tata na wa. Ule, Laion e Juda san dar lo ilasag yen den man, kin Dawid san tubun muroun sad kabuladi, in yu igane itout dugo insan ager adi ibiai dudu ya. Ago yak niñen o in ka kendel san

gurenj seven a ate buk dufutani an ipasip ifulale wa.”

⁶ Agog naj Sipsip Nanun ta itur dugo njle ya. Injan leil man dufunig imat ak igo wonj a. In kin san kalik titinjaem itur dugo, mel iwoiwo a kumaed dumado dan, agod matu gurman adi dulubanig dutur se ya. Injan fai an seven, ago dugo malan dam seven. Malan seven nek an Anut san Ur seven ama ya. Malan seven an Anut idinaig tan titin fidian lo dufufurak go diau a. ⁷ Aria, Sipsip Nanun yaug Tamol a kin san kalik fo imado dan banin won ak ate buk injane ya. ⁸ Saen buk an injane man, mel iwoiwo kumaedi dumado dan, agod matu gurman adi nunod 24 an dam, Sipsip Nanun njen fun na diau dudu ya. Matu gurman adi anen anen inj mel ta gita igo wonj,* agod gol daeg kisaek diabi se ya, ago dugo yakas mumalun uyanan ak daeg an fidian lo ilasa se ya. Yakas en man nek Anut san tamolpein sad gudanek amaiak touad yabi a. ⁹ In bar foun ak ta igo diabi da,

“Onj buk njanep kendel san gurenj ate buk dufutanig dufou yan fidian onj pasi san ulonj a.

Onj ago gane san man idaisuda geig a.

Ata wo, inj onj dufuno umat dugo,

onjane dar lo tamolpein Anut tuon lo dirai san udad a.

Tamolpein aenta man, warou fidian lo yak, muroun ru fidian lo yak, tinik naon sensen lo yak, agod tan titin fidian lo yan onj udad unjal a.

¹⁰ Onj inj tumaig an lo Anut san kagin panek an paen na dumado da, ago dugo inj dam Anut

* 5:8: Harp

san pris adi dilasa ya.

Agod in tan na kin igo won dumadop tamolpein ante dumado dan ditirnai a.”

¹¹ Agog naj malag yaug enel wei geig nejil dugo sad awad njalon a. In sad sutek man milion milion geig agod tausen tausen geig a. In mel kumaedi dumado dak, matu gurman adi, agod kin san kalik dam dulubanig dutur se ya. ¹² In awad tubun mi bar igo diabi se ya,

“Sipsip Nanun e dufuni imat en,

in dabai, filian, manau, tuon dabai ak, yanjan lak na geig ak, girager agod per dam, amaiak fidian inane san idaisuda mok a.”

¹³ Ago man naj melmel fidian Anut igane yak sad ru njalon a, melmel nek a kumaen panu lo yak, tan na dumado dak, agod tan paen na dien dan, beig lo da mi a. Mel a fidian aben fidian lo dien dan, igo dubol dugo naj njalon a.

“Tamol e in sinan kin san kalik fo imado den, agod Sipsip Nanun dam,

in sisem per panek, yanjak lak na yak, girager, agod tuon dabai ak da nek ago mi pempem mi dinane wa.”

¹⁴ An lo mel nunod iwoiwo kumaedi dumado dan, igo dubol, “Rumok!” Ago dugo matu gurman adi turud dusoluwig, urarum naod na ubou dile se ya.

6

Sipsip Nanun kendel guren buk dufutani an yafuteg ipasi a

¹ Naj leil njiganeg Sipsip Nanun in kendel guren malan te yak yafute dugo njile ya. Agog mel iwoiwo

kumaedi dumado dan, luluḡad lo kisaek in ru ta ibol a. Inṡan kulagun man weil ilinḡan oḡ da, inḡ igo ibol, “Palu!” ² An lo ḡai malag yau man, tamol ta inḡ hos milkouk ak fufo imasig fui yabi dugo ḡile ya. Inḡ tamol yu iganeg itout ak san kitikat kisaek dupani a. Inḡ man tamol yu igane itout ak igo woḡ a, aria, tan na ilasag yu iganep itout san ninḡen o yau dugo ḡile ya.

³ Saen Sipsip Nanun kendel gureḡ tinin te buk dufutani an yafute man, ḡai mel a tinin te kumaen imado dan igo ibol dugo ḡaloḡ a, “Palu!” ⁴ Agog hos sen ta ilasa yak man daran a, nek ibol yai balen tubun ak igo woḡ a. Tamol a fufo na imado dan dabai dupani a. Dabai an man, tamolpein tan en san inḡaned maror nugnug lo yan ipasi yau san, an lo tamolpein dumasap nugnug lo yu digane dop lo materḡ dile wa. An ninḡen o sabiri tubun ak ta dupani a.

⁵ Saen Sipsip Nanun kendel gureḡ utol buk dufutani an ipasi man, ḡai mel a tinin te kumaen imado dan igo ibol, dugo ḡaloḡ a, “Palu!” Ante ḡai malag yau man, hos bilkas ak kisaek ilasa dugo ḡile ya. Tamol a fufo na imado dan inḡ skel* kisaek tuon lo yabi se ya. ⁶ Ago man ḡai mel iwoiwo a kumaed dumado dan, luluḡad lo liliḡan ta nek ibol tamol awan lo ru ibol dak igo woḡ ḡaloḡ a. An lo man awak en igo ibol, “Oḡ waup ananḡ kiskisaek daoḡ pidinai a. Ago dop tamol ta nal kisaek urat igane yan san naon inḡanep ate wit bod nanun ak kisaek ka idad a, tia dop, bali bod kititik utol mi ka idad a. Ak man oḡ ai oliv agod ai wain da daoḡ

* **6:5:** Ru en man, muruan ibitinae san.

ta pidinai na wa, an lo dop ai uraru an gurenj lo ta katuk amadi na wa.”

⁷ Saen Sipsip Nanun kendel gurenj iwoiwo san buk awan dufutani an ipasi man, ηai mel utol an tinin te kumaen imado dan igo ibol dugo ηaloη a, “Palu!” ⁸ ηai foun mi malag yau man, hos tinin mateη san kitek milkouk ak ta ilasa dugo ηile ya. Tamol a fufo na imado dan iηsan yaηan Mateη, agod aben a yaηan Ades dubol dan lo tamolpein dumat la yak dumado dan man, Mateη patun fo iri ipalu se ya. Nunod uraru an tamolpein warou iwoiwo lo ditarpalep, warou kisaek dufu dumat san dabai dupidinai a. Ago dop uraru an kadag[†] lo, subam naon funfun lo, sabiri nam tamolpein dufup dumat a, ago mi tan san bor goun kasik ak dam dufu dumat a.

⁹ Saen Sipsip Nanun kendel gurenj kafenda ipasi man, ηai tamolpein dumat ak ηtudi alta paen na dumado dugo ηeil a. Gubak mi tamolpein nek an man, iη Anut san ru diabi dabai dugo iηsan ru itaot dubol ilasa na ya, an niηen o ager adi tuod lo mateη dile na ya. ¹⁰ Tamolpein ηtudi an awad tubun mi igo duwagiη se ya, “O Tubun en, oη Dababai a, oη gun di rumok a. Saen sapta yau dop man, oη tamolpein tan na dumado den kubianaip iηaned ai wadan niηen o ilo sou gane waki? Maη iloma igo yen da, iη dufunama mamat san naon oη ririan ka pidinai a.” ¹¹ An niηen o kulos milmilae milkouk ak, tamolpein kiskisaek dupidinai dugo, ru igo durupidai a. “An gidad yaes kitek abal gup, murna dop man ager adi aηanem urat kisaek adi Kristus ηien aban duri dan

[†] **6:8:** Futol

dufup dumat a, nek ibol ansem dufunan ak igo mi a. Aria, Anut tamolpein sapta maten dile san kob ipidinai la ya. An lo maten dinane yaup inaned sutek san kob idaisuda wa, ago dop Anut ananem ager adi yu digane yan naon ipidinai a.”

¹² Agog Sipsip Nanun kendel guren siks an ipasi dugo nile ya. Nai malag yau man, kanaurig tubun geig ak dam tan na ilasa dugo nile ya. An lo man ad bilkas, nek ibol tidom tubun ilasa won a. Kalam dam nek ibol dar igo won daran geig ilasa ya.

¹³ Agod keit san patui man, nek ibol tim tubun ak ifure dop gurab nunon ta ilubon na yak ikuparip tan na dudu dak igo won, nek ago mi patui an tan na dudu ya. ¹⁴ O lak na keit dam yau itout a, nek ibol taweg dulumu yaug dufou ak on a. An lo na did dam nui dam dusuk diaug insiganed abed dibiseig aben sensen lo diau a.

¹⁵ An lo man tan san kin adi agod tamol yanad aman da yak, yu tamol adi sad gurman adi, moni tamol adi, tamol dababai ak, bigabeg adi, tamol kawan dumado dak, fidian mi geig dusol go diau a. Aenta pat tutubun a did lo yan patud fo dimianuk dugo, aenta pat guburan lo dimianuk a. ¹⁶ Agog in disasai dugo did in pat da digiaig igo dubol, “An gidad adup man atuanama dop, Tamol e insinan kin san kalik fo imado den, man mile san ninen o abtuanama wa, man dugo, inanen naon mile wo tubun mi marer da. Agod Sipsip Nanun man ninema wo tinan imumari da, amaiak man sinjirema na ta ilasa san ninen o adup atuanama wa. ¹⁷ Enta wo? Nunod uraru en sad nal tubun ak ilasa la ya, nal an lo man inaned tinan mumarek tamolpein ifu wa. Amaiak ninen o enti in uraru an

sad dabai yabiani dop imado uyan ak i? Tan en lo talpein man tia geig a!”

7

Isrel tamolpein 144 tausen kob diņane ya

¹ Mel en fidian itout dugo, ņai eņel iwoiwo tan titin iwoiwo ante dutur dan ņeil a. Inņ tan titin iwoiwo yan san tim diabituanı se yan lo tim ta ifure na ya. Tim an tan na, beig lo, agod ai fidian ta iwi na ya. ² Ago man ad ilasa san banen lo eņel ta ilasag ipalu dugo ņile ya. Inņ banin lo tuod* ta kiņ san kob aman da yak yabi se ya, an lo mel kob igane san man, Anut a pempem kumaen imado dan inņsan mi a. Eņel iwoiwo yan gubak mi Anut dabai ipidinaig, an lo murnap inņ tan beig da ka dupitiņinai a. Aria, eņel a imug ņile yan awan tubun mi lo eņel iwoiwo yan igiai a. ³ Inņ igo ibol, “Anņ tan, beig, agod ai da, gugurut nam muruan ta apidinai na wa. Tia, maņ idsad Anut san kob, inņsan urat tamol adi naod kapen fo migane gup, melmel an malad ka asue wa.” ⁴ Agog tamolpein sapta kob a diņane yan dubol dugo ņai ņaloņ a. Sutek an man tamolpein 144 tausen, sisem kob an diņane ya, tamolpein an Isrel san gugoi anen anen luluņad lo dilasa ya.

⁵ Juda san gugoi lo 12 tausen kob diņane ya.

Ruben san gugoi lo 12 tausen,

Gad san dam 12 tausen.

⁶ Ago mi urig 12 tausen ta Aser san gugoi,

12 tausen ta Naftali san gugoi,

12 tausen ta Manase san gugoi lo ya.

* **7:2:** Kiņ san mitilaen ai fo dusuwari ak

⁷ Nek ago mi 12 tausen ta Simion san gugoi,
 12 tausen ta Lewai san gugoi,
 12 tausen ta Isakar san gugoi lo ya.

⁸ Nek ago mi 12 tausen ta Sebulon san gugoi,
 12 tausen ta Josef san gugoi,
 12 tausen ta Benjamin san gugoi lo ya.
 Tamolpein en in Anut san kob dijanane ya.

*Tumanek tubun ak lo tamolpein kulos milkouk
 ak didiri da*

⁹ An itout dugug naj malag yau man, tumanek tubun mi geig kin san kalik, agod Sipsip Nanun dam, naod na ditilianig dutur se yan nejil a. An lo man talpein ta isutai san ta ilon na ya. Tamolpein an man warou fidian lo, tinik naon sensen lo, muroun ru fidian lo yak dupalug dutumani a. In kulos milkouk milmilae ak didiri dugo, banid lo man pator roun duburou se ya. ¹⁰ In awad dabai geig igo duwagin se ya,

“Idsad patu pasek an man, Anut a injanen kalik fo imado dan,
 agod Sipsip Nanun dam, in nujod urarum patu pasek an san fun mok a.”

¹¹ Ago dugo enel fidian man, kin san kalik, gurman adi, agod mel iwoiwo a kumaed dumado dan dida dulubanaig dutur se yan, ditakoksig naod kapen tan dusueg Anut ubou an dile ya. ¹² In igo dubol,

“Rumok geig, per, girager,
 manau, ilo uyan panek, yanak tubun,
 dabai tubun, agod tuon dabai geig ak dam,
 an fidian pempem mi man Anut san mi a.
 Rumok!”

¹³ Agog gurman ta tamol gurman adi luluad lo yak naj igo isumianag a, “Tamolpein nek a kulos

milmilae milkouk ak didiri an, en sauta yak i? In aben dugon te dupalu yak i?”

¹⁴ Ago man naj ru naon njurupeig njabol, “Tamol tubu, onj mi ulon a.”

Agog inj igo irupaia g a, “Tamolpein en man muruan tubun ak madai da lo, Anut irapasaig kuai te dilasa ya. Inj gubak mi Sipsip Nanun san dar lo inaned kulos dufulanig, kulos an milkouk geig ilasa ya. ¹⁵ Amaiak ninjen o,

“Inj Anut san kalik naon na dutur da.

Ad tidom injsan ubou ab lo dumado dugo, Anut o biabi digane da.

Tamol a inanen kalik fo imado dan, inj dida sumeikan dumado dop dumui igo wonj ibalfutanai a.

¹⁶ Inj fon kadag ta ibiai na wa, agod inj kulagud ta igos na wa.

Ad dam tinid ta inani na wak, mel ta tinid iganep wananan geig san tia ya.

¹⁷ Ata wo, Sipsip Nanun inj kinj san kalik titinjae mi imado dan, injsad titianek tamol imado wa.

Inj kumaen san you ibanai dan san aben ate diau san ninjen o ulum ad yabi wa.

Agod Anut injsen mi inaned malad turon fidian mi isasi dop tinan fon digane san tia ya.”

8

Sipsip Nanun kendel guren seven an ipasi a

¹ Saen Sipsip Nanun kendel guren seven a buk dufutani an ipasi yau man, kumaen panu lo mel ta lilijan igane san tia yak, agod ru taidam ilasa san tia ya. Ago mi yaug auwa wadan mi igo wonj a.

² An itout go ñai eñel seven e Anut naon na pempem dutur den ñeil a, ago dugo barag seven dupidinai a. ³ Agog eñel sen ta ipalug alta fun na itur a. Inj paura san daeg gol yakas mumalun uyan geig igane ilasa dak yabi a. An lo man inj paura naok an wei mi geig dupani dop, inj ate Anut san tamolpein fidian sad gadiñ da itumani wa. Ante Anut san kalik naon na yai niganag san alta gol itur dak ate Anut yai digane dupani wa. ⁴ Aria, yakas an inñsan mumalun uyan ak inj Anut san tamolpein sad gudanek da itumanig, eñel e Anut naon na itur den, banin ibiseig lak na yau a. ⁵ Ago man eñel an alta san yai inañeg, daeg an lo ikulmaek go inawai a. Agog inj daeg an tan na ibildu ya. An lo man, saen wei mi keit ilinñan se yak, liliñan funfun dilasa se yak, weil irafule dugo kanaurig dam ilasa ya.

Barag seven eñel adi duwi a

⁶ Agog eñel seven a barag seven duburou dan, inj barag an duwi wo sed ikubianaig mala nouk dumado se ya.

⁷ Agog eñel malan te yak inñsan barag iwi dugo ui ais agod yai inj dar da dilasag eñel an iburoug tan na isuwaraig dudu ya. Aria, tan en ai fidian da itarpaleg malan utol dilasag, luluñad lo malan kisaek muruan ipani wa. Ui ais agod yai dar anda dudug mel a utol amaiak malan kisaek dufuni a. An lo man tan ai fidian malan kisaek ilon lo yan yai inanai pasi a. Ago dugo gafurfur mum* ak dam fidian mi yai inani yau a.

* 8:7: Grin

⁸ Agog enjel tinin te imado dan inſan barag iwi dugo, mel ta did tubun ak inani dak igo woŋ, dubuli beig lo idu ya. Aria, beig itarpaleg malan utol dilasag, luluŋad lo malan kisaek muruan ipani a. Malan kisaek an lo man, beig dar igo woŋ ilasa ya. ⁹ Mel beig lo kumaedi an dam, inŋ warou ditarpaleg utol dugo, warou kisaek mi dumat pasik a. Nek ago mi, wog fidian beig aten fo weinŋ diabi dan dam, warou ditarpaleg utol dugo warou kisaek mi daonŋ inŋane ya.

¹⁰ Agog enjel uraru an tinid te imado dan, inſan barag iwi dugo patui tubun ak kisaek, sul igo inani fufari ak, keit ibiseig yau idu ya. You bururuk yau dan fidian, warou ditarpaleg utol dugo, patui tubun an idug warou kisaek an mi ifuni a, nek ago mi, you gib lo ibanai dan fidian, warou ditarpaleg utol dugo, patui an you naok an dam ifuni a. ¹¹ Patui en san yaŋan man “Gigen Geig” ago dubol da. Inŋ you warou kisaek fufo na idu dugo, you an gigen geig ak ago ilasa ya. You a duluk an lo tamolpein wei kasik materŋ dile ya.

¹² Agog enjel a utol an tinid te imado dan, inſan barag iwi dugo, mel ta ipalug, ad, kalam agod patui muruan ipidinai a. Nuŋon igane ilasa man igo ya. Nal anen anen, saen lapan ad ided dak san lilaman ta ilasa na ya, agod saen lapan tidom san lo dam kalam san lilaman ta ilasa na ya. Patui lo dam nek ago mi a. Lilaman lapan fidian ditarpaleg utol dugo, lapan kisaek ta ilasa na ya, ad lo, tidom lo dam nek ago mi a.

¹³ Nai malag yau dugo bog ta tubun ak keit titiŋae mi irou dugo ŋile ya. Inŋ awan tubun mi igo iwagiŋ se ya, “Muruan di muruan agod muruan

tubun geig tamolpein a tan na dumado dan sad na ilasa wo da. Enjel wadan nuḡod utol amaiak inaned barag duwi wo da, saen barag an duwi dop muruan tubun geig ak ilasap tamolpein disini wa.”

9

¹ Agog enjel a enjel iwoiwo tinid te imado dan, inṡan barag iwi dugo patui ta ḡile ya. Gubak mi keit ibiseig tan na yau idu ya. Inṡ gib kuror geig fun tia yan san dalawan san ki dupani a. ² Agog patui an gib kuror an awan ipasi a, agog yakas gib an lo ilasa yan, yai tubun ak san yakas igo woṡ a. Agod yakas a gib lo ilasa yan, ad inṡ keit da ibuluwaig ad inṡ keit da tidom tubun dilasa ya. ³ Agog mel wei mi sad leil man makmaguk igo woṡ, yakas en dibiseig tan fidian lo diau a. Inṡ dabai a diṡane yan man, nek ibol tan en san buramat ai sukulon lo dumado dan sad dabai igo woṡ a. ⁴ An lo inṡ makmaguk adi ru igo durupidai, “Anṡ tan en san gufurfur, garanṡ agod ai fidian dam daonṡ ta mok apidinai na wa. Tia, anṡ tamolpein nek a Anut san kob naod kapen fo tia yan miṡ madai apidinai a.”

⁵ Anut yilafu onṡ dugo kalam kafenda lo tamolpein madai tubun geig ak dupidinai a. Ak gug dufu dumat san geg ipidinai a. Aria, madai dupidinai na yan man, nek madai a buramat uyun bitinṡen si anda yak nam talpein issue dak igo mi a. ⁶ Saen en lo, tamolpein mateṡ san dal abanṡan diabi wa, gug ta dumat na wa. Inṡ dumat o ilod tubun mi yen da, ak man mateṡ tamolpein an ibisawaip isol yau a.

⁷ Njai makmaguk en ḡeil duman, inṡ hos yu digane wo tawanṡ digane woṡ da. Inṡad kabunṡad fufo mel

ta gol kitikat igo wonj dien da. Naodi man tamol naod isiai a. ⁸ Injsad gumurad roun dam, pein adi sad igo mi a. Agod injsad luod dam laion luodi igo wonj a. ⁹ Nek ago mi injsad titiredi man, mel ta siot kapa igo yak nam dubuluwi a. Injsad subarid san liliñan man, hos adi karis wei mi diraug yu lo diau dak ago mi a. ¹⁰ Injsad uyudi man buramat igo wonj a, agod uyudi bitinjen san si marasin saian ak lo madai tamolpein dupidinai san yen da. Injsad uyudi dabai an ate kalam kafenda tamolpein madai tubun geig ak dupidinai a. Dabai naok ago yan uyudi lo mi yen da. ¹¹ Kinj ta kisaek injsad gurman imado da. Kinj an man enjel a gib kuror ak itirni da. Hibru ru lo enjel an yañan Abadon dubol da, agod Grik ru lo dam yañan Apolion dubol da, fun man “Daon Niganag Tamol.”

¹² Aria, muruan tubun geig ak malmalan itout a. Ak man muruan tubun geig ak taidam uraru mi dilasa wa.

¹³ Agog enjel a enjel kafenda tinid te imado dan, injsan barag iwi dugo, ñai tamol ta san awan ñaloñ a. Alta gol a Anut naon na yen dan lo, mel ta nek ibol makau faian igo wonj, alta san sukurun iwoiwo ante dugunig dien da. Aria, awak a ñai ñaloñ an fai an lo kuai te ilasa se ya. ¹⁴ Awak an enjel a barag yabi dan irupeig ibol, “Enjel iwoiwo amaiak you tubun ak yañan Yufretis dubol dan, ate kam nam dusbanaig mala nouk dumado dan, gamu en ka bisawaip diau a.” ¹⁵ Inj ru an ilonj go enjel iwoiwo yan ibisawaig, tamolpein warou ditarpalep utol dop warou kisaek lo tamolpein fidian dufup dumat a. Enjel emaiak mi, Anut ru gubak mi igansig inj auwa, nal, kalam agod anañar

nek en mi ate tamolpein dufu dumat san niñen o tawan dumado wo ago ibol a. ¹⁶ Tan na yu tamol adi a hos fufo na dumado dan, inşad sutek man 200 milion igo yak dubol dugo ŋai ŋaloŋ a.

¹⁷ Aria, ŋai malag ŋutun lo aban ŋile dan lo man, hos emaiak, agod tamol adi fufo na dumado dan sad leil man igo ya. Tamol adi titired fo mel ta siot kapa igo woŋ ak didiri dan, sad girager man daran, yedyed di kadabog a. Hos sad kabuŋadi man laion kabuŋadi igo woŋ a. Agod yai in yakas da, agod pat salfa inani dak san mumalun saian ak dam, hos adi an awad lo ilasag ifufurak go gidigidad diau a. ¹⁸ Tamolpein fidian tan en lo dumado den warou ditarpaleg utol go, warou kisaek man, muruan a yai, yakas, agod pat salfa inani dan nek amaiak warou an dufunig inanen tamolpein fidian dumat pasik a. ¹⁹ Hos adi sad dabai man, awad lo agod uyud lo dam yen da. Uyudi man mot igo woŋ a, in kabuŋad da ya. An lo hos uyudi amaiak nam tamolpein tinidi tubun mi madai dupani da.

²⁰ Ak gug tamolpein aenta a muruan amaiak lo maten ta dile na yan, inşed ilod lo mi tubud sewak adi, banid nam dututuŋanai dan ta patud dupidinai na ya. Tia geig, kagin naok naok a gubak mi digane se yan dirig diau a. In bugai adi sad ubou leil digane se ya. Agod tubud sewak mitilaedi, tamol inşed banid nam gol silva bras pat agod ai nam digane yan lo dam gadiŋ diganeg yau se ya. Tubud sewak mitilaedi an gidad aban ta dile na dugo, ru dam ta duloŋ na dak, agod in turen dam ta diabi na da. Ago bo man tamolpein an ilod ta ibilisa na ya. ²¹ Taida mi, tamolpein amaiak

in, tamol dufu dumat san kagin, aenta lo nawir digane san kagin, inaned jeit kagin, agod inaned gumagam kagin dam, an ninedi wo ilod ibilisag kagin amaiak patud dupani man tia ya.

10

Enjel ta buk nanun ak Jon yani wo ipani a

¹ Agog enjel sen ta dabai geig ak kumaen panu nag idu dugo njile ya. In kabunan fufo galbaob ilubanig yen dugo tinin dam keit san timtaen ibuluwi a. Naon san ilalan man ad igo won a, nek ago mi njen san leil man kadan uraru inani dak igo won a. ² Enjel en man buk kutusan ak kisaek awan ikasap go yen dak yabi se ya. In njen won ak beig fufo ipare dugo, njen nas ak tan ipare da. ³ Ago dugo in awan tubun mi isasai da, nek ibol laion ibob igo won a. In ibob itout a, ago gug weil seven sad lilijan an dam inaned awad lo ru dubol ilasa ya. ⁴ Weil seven an sad lilijan itout a, ago gug naj ru dubol en njigire wo da. Ak man awan kisaek kumaen panu na yak ipalug igo ibol dugo naj nalon a, “On ru e weil seven dilijan en onsga ilo girek lo tuep yen a. Inaned ru on ta gire na wa.”

⁵ Agog enjel e tan beig da fufo itur den banin won ak kumaen panu san banen lo yabisa dugo naj njile ya. ⁶ Ago man in Anut yanjan lo ru lak na geig ibol ilasa ya. Anut enti kumaen pempem mi imado dak, kumaen panu igane yak, mel fidian ate dumado dan dam igane yak, tan dam iganeg mel fidian ate dien dak, beig dam iganeg mel fidian dam lo dumado dan, inanen yanjan lo igo ibol, “Anut saen irinani san tia ya.” ⁷ Tia, nek enjel e enjel

sukunda tinid ate murna geig imado den, inſan barag iwi dop san liliſan ilasa wan, kulob an san saen lo mi, Anut san ilo girek gubak mi mianuk lo yen se yan nuſon ilasa wa. Ilo girek nek amaiak mi imug inſanen urat tamol profet adi irupidaig duloſ a.

⁸ Agog awak a gubak mi kumaen panu nag ipalu dugo ſalooſ amaiak fon igo ſai irupaiaſ go ibol, “On waup eſel a tan beig da fufo itur dugo, banin lo buk awan ikasap go yen dan, san na susap buk amaiak ſane wa.”

⁹ Ago yak niſen o ſai eſel an san na ſaug ſurupei, “On buk kutusan en ſai panag a.”

Ago man in igo irupaiaſ a, “On ſanep wani wa. In on tiſae lo yu igane wa. Ak man onſa awa lo man guburur taen igo bulbal geig a.” ¹⁰ In ru ibol itout dugo, ſai buk kutusan an banin lo niſaneg ſani a. ſai awag lo man guburur taen igo bulbal a. Gug saen ſai ſani paſik an lo man tiſaeg lo gigen ifunag a. ¹¹ Agog in igo ſai irupaiaſ a. “On gidad fon mi tamolpein warou wei mi, tamolpein a tan tutubu yak san wei mi, muroun ru amad da yak wei mi, agod kiſ adi wei mi dam, niſedi wo melmel dilasa san niſen o profet ru ubol ilasa wa.”

11

Profet uraru ru dubol ilasa ya

¹ Agog ſai melmel touad ſabi san ai tok dupanag an, nek ibol tureſ san makud on a. Agog awan ta igo irupaiaſ, “On maſap Anut san tempel Jeruſalem na yen da, agod alta tempel ilon lo yen dan dam, tou amad wabi wa. Tamolpein ſapta ubou ab an ilon lo ubou dile dugo dumado dan

dam on sutai a. ² Ak man on aben e Anut san ubou ab insan ar patun fo ilubani yen man, tou aman ta wabi na wa. An on gidad bisei a. Ata wo? Anut aben en man gob adi insad tumanek san aben igo won ipidinai a. Gob adi dupalup Jerusalem dupartitale dop ate san tamolpein ditirnaip yaup kalam 42 itout a. (An man nal 1,260 igo ya.) ³ Agod naj naisag ru bilabal tamol, nunod uraru an profet ru dubol ilasa san dabai npupidinai a. Ago dop in mugun san kulos didirip profet ru dufulale dop yaup nal 1,260 itout a.” ⁴ Tamol uraru en man in ai oliv agod lam uraru niñedi wo Sekaraia inanen profet ru lo gubak mi ibol ilasa ya. Tamol uraru en tan titin fidian sad Tamol Tubun ak naon na dutur da. ⁵ Agod talpein ta tamol uraru an dibitiniaip malad dusue wo tap man, yai uraru an awad lo ilasap, iwali dop sad ager adi inanai pasi wa. Dal nek amaiak lo talpein enti tamol uraru an ibitiniaip muruan ipidinai o igane dan dufunip imat a. ⁶ Uraru en in keit diabituanani san dabai amad da ya, an lo saen in profet ru dubol ilasa dan lo, ui pempem ta idu na wa. Uraru an in you fidian diganep, dar igo won ilasa san dabai amad da ya. Agod insiganed ilobol lo mi man, daon panek agod subam naon funfun diganep, an lo tan en san tamolpein muruan di madai funfun ifu wa. Uraru an in dabai naok ago yan amad da ya.

⁷ Saen nunod uraru an, profet ru dubol ilasa san urat digane itout dop man, mel kasik ak a gib kuror fun tia yak lo imado dan, in gib an ibiseip kuai te isudap, uraru en lo yu igane wa. In uraru an ibiai dudu dop ifup dumat a. ⁸ Ago dop insad tubabudi taun tubun ak san dal tubun ak ate dien

a. Taun tubun an san yaŋan man, tou yabek ru lo Sodom in Egipta da ago dubol da, taun tubun nek emaiak ate, Tubun en aigim fo dubali dugo dufunig imat a. ⁹ Tamolpein tinid naon sensen ak, warou wei mi ak, muroun ru lo diŋiŋeŋ na yak wei mi, agod tamolpein tan titin fidian lo dupalu yan, nal utol wadan da lo in malad ti ibol pe, uraru an tubabudi leil dupidinai a. In tamol aenta disiriai san niŋen o dal dufou wa. ¹⁰ An lo tamolpein tan san, uraru dumat an sad mateŋ niŋen o muguruŋ digane wa. In soubul digane dop, lou kawan ak dam wei mi nugnug lo didiri ila iso wa. Man ata wo? Profet uraru an madai in muruan da wei mi tamolpein tan na dumado den dupidinai na ya.

¹¹ Ak man nal utol wadan da itout gug, Anut ur kumaen san an iganeg uraru an ilod lo iladu ya. Saen uraru an dumasag dutur se yan, tamolpein uraru an dil dugo direr saian geig dop sed ibibianai se ya. ¹² Agog tamol uraru an talpein ta kumaen panu na awan tubun mi igiai dugo irupidaig ibol, “An igo asida!” Ago dugo in sad ager adi malad lo mi, tamol nuŋod uraru an, keit san timtaen ilon lo diladug, kumaen panu lo timtaen an da disuda diau a.

¹³ Saen nek amaiak lo mi, kanaurig tubun ak ilasa dugo, taun tubun an titin kisaek daon ipani a, ago gug titin 9 an yen a. An lo man seven tausen tamolpein kanaurig an lo dumat a. Gug tamolpein a dumado yan, tubun mi geig direr dugo, kumaen panu san Anut yaŋan diabisa se ya.

¹⁴ Aria, muruan tubun geig ak uraru itout a. Ak man saen kitekan mip, muruan wadan kisaek tubun geig ak ilasa wo sumeik da.

Enjel warou seven lo yan injsan barag iwi a

¹⁵ Agog enjel e enjel sukunda tinid ate murna geig imado den, injsan barag iwi dugo, kumaen panu lo awak tubun mi igo duwagin dugo naj nalon a.

“Anut tan titin fidian en sad kin adi inaned kagin panek iganeg itout a, ago dugo Anut inanen Kristus da sad kagin panek ilasag abed inane ya.

An lo Tubun en injsen saen pempem kin igo imado yau a.”

¹⁶ Agog tamol gurman adi nuḡod 24 injsigened kin san kalik fufo Anut naon na dumado dan, turud dusoluwig naod itakok tan na idug Anut ubou an dile ya. ¹⁷ In ago dubol,

“O Tubun en, maḡ ilo uyan mupano da. Oḡ mi Anut, oḡ dabai fidian ama da ya.

Oḡ gamu mado dak, gubak mi geig mado ya.

Gamu oḡane dabai tubun geig ak ḡaneg, an lo fun ganeg oḡ Kin igo woḡ mel fidian tirnai da.

¹⁸ Gob adi tinḡaed imumari se yak gug, oḡane tinḡae mumarek san saen man ilasag itout a.

Gamu man tamol adi dumat ak oḡane kot lo dilasa wa.

Oḡane urat tamol adi naon uyan ak pidinai san saen man gamu.

Awo, oḡane profet adi, agod oḡane tamolpein fidian dida, tamolpein fidian a oḡane yaḡa lak na disini dan, a in yaḡad aman da yan, agod a in yaḡad tia yan dam, gamu oḡ naon uyan ak pidinai a.

Ago dop on tamolpein a tan en daon dupani se yan, gamu daon pidinai a.”

¹⁹ Agog Anut san ubou ab kumaen panu na yan, inſan dalawan dupasig ikasap go yen da. Ago man Anut san ubou ab lo kontrak san kunup kuai te yen dugo fidian leil dupani a. Saen an lo weil irafuleg gidigheid yau dugo, liliſan tubun mi inſur a, agod weil weiwei mi diliſan dugo, tan isuruwor dugo, ui ais da pat igo woſ tubun mi geig dudu ya.

12

Jon in, mot a yanſan dragon dubol dan pein da yil
a

¹ Aria, mel ta naon sen geig ak keit lak na ilasa ya. Mel an man igo ya. Pein ta imado dan, in ad kulos on igane dugo itur da. Kalam nien aten paen na yen dugo, patui 12 kitikat igo woſ kabuſan fufo dien da. ² Pein en luan aman da ya. Agod nanuk igansi san madai in lo ilasa ya. In nanuk igansi wo dugo, madai tubun geig ikubiani dan niſen o awan tubun mi isasai da. ³ Agog taida mi, mel ta naon sen geig ak keit lak na ilasa ya. An man mot daran di tubun geig a. In kabuſan seven, agod fai an 10, kabuſan fufo dilasag dien da. In kabuſan seven an fufo, kitikat ta kiſ san kitikat igo woſ dien da. ⁴ In keit san patui fidian itarpaleg warou utol dilasag, warou kisaek inſen uyun nam irianaig tan na dudu ya. Agod mot an yaug pein a nanuk igansi wo dan naon na itur se ya. Inſan ilon man, pein nanuk igansi wo ititiani da, agod saen nanuk ilasa dop ka yani wa. ⁵ Aria, pein nanuk tamol ak igansi a. Nanuk an murnap kiſ san tok ain yabip ate tamolpein fidian itirnai

dabai a. Pein nanuk igansi la ya, ago man nanuk an ririan disinig, Anut san na diaug, Anut da inſan kalik fo dumasig dumado ya. ⁶ Ago man pein an isol go, aben kawan ak ate yau a. Aben a pein ate imado san man Anut gubak mi ikubune la ya. Aria, aben an lo inſan pein an ananſan dupani dop kagin dupani yaup nal 1,260 itout a.

⁷ Aria, gamu yu tubun ak kumaen panu na imasa ya. Isrel san eſel gurman, yaſan Maikel dubol dan, inſan eſel dida mot tubun en lo yu digane se ya. Ago dugo mot tubun an inſan eſel dida yu naon digane se ya. ⁸ Ak man inſan yu diganep itout san dabai amad tia ya. Ago yak niſen o kumaen panu lo aben ta ate dumado san tia ya. ⁹ An lo man Maikel inſan eſel dida mot emaiak san dabai kumaen panu lo yan diganeg itout a. Mot en man, inſan gubak mi yaſan Uf Ru San Ur, yaſan turan Satan dubol dak, ama ya. Inſan tamolpein tan titin fidian lo yan irawai na ya. Aria, inſan Satan diſaneg, inſan eſel adi dida sisem dubilai tan na dudu ya.

¹⁰ Agog kumaen panu lo tamol ta awan dabai geig igo iwaginſan dugo ſalonſan a.

“Gamu maſsama Anut inſan patu pasek, agod inſan tuon dababai ak di kagin panek dam walal isi a,
agod Kristus san dabai dam ilasag kuai te yen da.

Man dugo, mot emaiak ad tidom Anut naon na itur dugo

maſ teim taom uf ru lo idirai na ya,
ak gug gamu tan na dubilig idu ya.

¹¹ Maſ teim taom man, Sipsip Nanun san dar nam,

agod Anut san ru dufulale na yan lo dam,
 inj mot en lo yu diganeg itout a.

Injsiganed madok ninjen o tubun mi ta dumat na ya,
 tia geig a.

Amaiak ninjen o saen matenj sumeik ipidinai
 bo man, inj ta dusuk dumul na ya.

¹² Amaiak ninjen o anj kumaen panu adi,
 anj warou fidian mi kumaen panu na amado
 dan, uyasusai agane wa.

Ak man anj a tan na agod beig lo amado dan, kagin
 agane wa.

Muruan tubun ak anjsam na ilasa wo da. Satan
 anjsam na idu la ya.

Inj ilon tubun mi imumari da,
 man dugo, inj ilonj uyanan ak man, injanen saen
 katukan mi a.”

¹³ Aria, saen mot an dubilig tan na idu dugo ile
 man, pein a nanuk tamol igansi amaiak yabi wo
 njen aban irig yau se ya. ¹⁴ Ak gug bog tubun ak
 subein uraru pein an dupanig, an lo inj mot ibiseip
 iroup, yoitout imado wo aben kawan ak lo yau a.
 Aben ante kagin dupani uyanan pe, ananj dupani
 yaup ananj utol wadan da itout a. ¹⁵ Aria, mot
 en awan lo you igulani a, you an lom tinan igo
 wonj imasag yaug, pein en njen aban iri se ya. Mot
 injsan ilon man, you gidad pein injanep iriani yau
 dop ideg yau a. ¹⁶ Ak gug tan pein an ibinawi a.
 Tan awan isupanig mot you e igulani emaiak iluk
 a. ¹⁷ Agog mot inj pein en lo ilo wananan tubun
 mok aman da ya. Amaiak ninjen o inj yaug nanun
 aenta lo yu igane wo da. Tamolpein nek a Anut
 san ru kubiaen duri dupani dugo Jesus Kristus san

ru rumok diabi dabai dan lo yu igane wo da. Ago dugo mot in loŋ na lul fufo na itur dugo n̄ile ya.

13

Beig san mel kasik

¹ Agog n̄ai malag yau dugo mel kasik ak ta kabuŋan seven dugo fai aman 10 an beig lo yak ilasa dugo n̄ile ya. Fai anen anen atem kitikat gol kisaek fufo na yen da. Kabuŋan anek anek ate dam, yanjak ta Anut niŋen uf ru digireg yen da. ² N̄ai mel kasik e n̄ile man, nek ibol lepad* igo woŋ a. In̄san n̄ien man bear n̄ien oŋ a. In̄san awan dam laion awan oŋ a. Mot amaiak in̄sinan dabai mel kasik en tan itirni san niŋen o ipani a. An lo man mel kasik an, mot an kiŋ san kalik fufo imasi dugo, in̄anen tuon tubun geig dam in̄aneg lo tamolpein itirnai na ya. ³ In̄san kabuŋan kisaek wagai lo materŋ san baob in̄ane man oŋ a, ak gug kabuŋan an dukubuneg afon uyan isusa ya. Tamolpein fidian tan tilianek lo yan mel kasik an niŋen o durut saian geig dugo tinid n̄utud fidian mi lo n̄ien aban duri na ya. ⁴ Mot en in̄sinan dabai a lo tamolpein itirnai san an mel kasik an banin lo igane ya, an lo tamolpein fidian mot an ubou an dile na ya. Agod in̄ mel kasik an dam ubou an dile na ya. Ago dugo in̄ igo dubol, “Enti in̄ mel kasik en igo mi ak i? Enti in̄ lo ka yu igane wak i?”

⁵ Agod mel kasik an awan lo ru in̄in̄eŋ san dabai dupani a. An lo Anut imoig, mel kasik an Anut niŋen o uf ru saian geig mok ibol ilasa se ya. Agod Anut dabai ipanig an lo tamolpein itirnai

* **13:2:** Pusi tutubu yak.

dop yaup kalam 42 itout a. ⁶ Amaiak niñen o mel kasik an awan isupanig, Anut niñen o uf ru ibol se ya. Inj Anut yañan niñen o, agod Anut san aben ate imado dan, agod fidian a kumaen panu na dumado dan, niñedi wo nao futek ru saian geig ak ibol se ya. ⁷ Taida mi, Anut mel kasik en ilefunig inanen tamolpein lo yu igane dugo ibiai dudu geig a. Agod Anut mel kasik an ilefuni dugo tamolpein warou fidian, tan tutubu yak, muroun ru anen anen, agod tinik naon sensen ak fidian mi itirnai san dabai inane ya. ⁸ Tamolpein fidian tan en lo emaiak mel kasik en dugudanip ubou an dile wa. Ak man warou kisaek mi ago ta digane na wa. Warou an man, tamolpein fidian nek a, tan en gamugo ilasa dugo, Anut inaned yañadi buk lo igire idu ya. An man Sipsip Nanun dufunig imat ak inanen kumaen san buk nek ama ya. Aria, tamolpein nek an mi mel kasik an san ubou ta dile na wa.

⁹ Talpein ta inj kududon aman da dop, inj gidad ru en ilon siñaokan a.

¹⁰ Anut talpein ta subanek lo yau wo kob ipani tap, aria, inj gidad subanek lo yau a.

Agod inj talpein ta sabiri nam dufunip imat o kob ipani tap,

aria, talpein an sabiri nam ka dufunip imat a. Kagin en lo man, Anut san tamolpein gidad dumado dabai dop inaned ilo rumok diabi sakar dop dumado yau a.

Mel kasik ak tan log ilasa ya

¹¹ Agog ñai mel kasik ak sen ta tan ilon lo yak imasag isuda dugo ñile ya. Inñsan kabuñan fufo

man fai aman uraru dien da, nek ibol sipsip nanunan ak san fai igo wonj a. Agod inſan ru man mot tubun ak san ru igo mi a. ¹² Mel kasik a imug ilasa yan malan lo man, mel kasik a murna ilasa yan, inj mel kasik a imug ilasa yan wagen lo, san dabai fidian tamolpein itirnai san injane ya. Dabai injane yan lo man, mel kasik a murna ilasa yan tamolpein e tan titin fidian lo dumado den idiraig, mel kasik a imug ilasa dugo injanen matej san baob dukubuneg uyan isusa amaiak, ubou an dile se ya. ¹³ Mel kasik murna ilasa yan kulob girager tubun ak iganeg ilasa se ya. Inj ago iganeg, tamolpein malad lo yai keit lo yan tan na idu ya. ¹⁴ Anut mel kasik emaiak ilefunig kulob girager naon sensen ak, mel kasik a imug ilasa yan malan lo igane se ya. An lo man mel kasik en inj tamolpein tan na dumado den irawai pasik a, an ninjen o man tamolpein mel kasik a gubak mi sabiri nam dufuni an san mitilaen ditutujanip duguni wo isodudunai a. ¹⁵ Agod Anut imoig mel kasik murna ilasa yan inſinan ur iwig lo mitilaen an kumaen ilasa ya. An lo man mitilaen an ru ka injinjen san ilonj a, agod dugo tamolpein ensauta a mel kasik an san mitilaen ta ubou an dile na yan fidian idiraig matej dile ya. ¹⁶ Taida mi, mel kasik a murna ilasa yan tamolpein fidian nek a yanjad amad da yan, yanjad tia yan dam, filiad amad da yak, tia yak dam, a kawan dumado dak agod a bigabeg urat digane dan, fidian mi idiraig kob ta naod kapen fo boi, tia dop, banid won ak ate dijnane ya. ¹⁷ An lo man, talpein ta inj kob aman tia tap, aria, inj tamolpein aenta sad na melmel ta

idad na wak, agod aenkadi inſan na dam melmel ta didad na wa. Kob an man mel kasik malan te yak san yaſan boi, tia dop, sutek amaiak lo mel kasik an yaſan tou aman yabi dan, nek ama ya.

¹⁸ Talpein ta in mel en ilon o imat tap, gidad kankan milaen uyan geig ak aman da wa. Enti in kankan milaen tubun ak aman da yan, mel kasik en san sutek kuai ka ipani wa. Sutek en man tamol ta inanen yaſan san tou yabek, agod tamol an yaſan san sutek man 6 utol mi a. (666)

14

Sipsip Nanun tamolpein 144 tausen dida dutur go bar diabi da

¹ Agog űai malag yau man, Sipsip Nanun in Did Saion fufo na itur dugo űile ya. In 144 tausen tamolpein dida dutur da, inanen yaſan, agod Taman yaſan dam, tamolpein an naod kapen fo digireg yen da. ² Ago dugo űai ru awan ta kumaen panu lo ibol ilasa dugo űalon a. An man nek ibol beig tubun ak imasa san liliűan boi, tia, weil san liliűan tubun ak igo won a. Nek tamolpein wei mi mel ta gita igo yak* dufuni dop san liliűan tubun mi ilasa dak igo won a. ³ Tamolpein 144 tausen kin san kalik naon na dutur se ya, agod mel iwoiwo kumaed dumado dan in matu gurman adi dam, naod na dutur se ya. In bar foun ak diabi se ya, tamolpein aenta bar an diabi san maűau ta diűane na ya, 144 tausen amaiak mi bar an diabi san dulon a. Tamolpein amaiak mi tan en lo Anut idad inűal a. ⁴ Tamol emaiak pein adi dida sed nun

* 14:2: Harp

ta ipidinai na ya. Tia, in̄ ikokan mi dumado da. Sipsip Nanun panu fidian lo dugon te yau dan, aria, tamol adi emaiak durig dida diau da. Anut warou nek emaiak, tan san tamolpein luluḡad lo idad in̄al a. Agop in̄ warou malan te Anut in̄al an, in̄anen warou lo, agod Sipsip Nanun san warou lo dam dumado wa. Nek ibol abi taman anaḡ malan te ilasa dak in̄anep, Anut yai igane pani dak igo woḡ, tamol an Anut agod Sipsip Nanun da sad ilo rumok adi e tan en lo imug dilasa yen, nek ama ya. ⁵ In̄ ru sewak ta dubol man tia ya. Tia, in̄ mel ta niḡen o dam muruan amad tia ya.

En̄el utol ru dubol ilasa ya

⁶ Agog ḡai en̄el sen ta keit titiḡae mi irou dugo ḡile ya. In̄ bilaluḡ uyanan pempem san isinig tamolpein tan na dumado den irupidai o da. Tamolpein tinid naod funfun lo, muroun ru naon sensen lo, warou fidian lo, agod aben fidian muroudi lo ibol ilasa wa. ⁷ In̄ dabai geig igo iwagiḡ go irupidai, “An̄ gidad Anut niḡen o arer a! In̄ yaḡan abisa wa! Ata wo? In̄ tamolpein bitinaek lo idirai san nal ilasa la ya. An̄ Tamol e in̄ keit, tan, beig di you gib lo ibanai dan dam idirai en, in̄ lo mi agudani dop in̄anen ubou leil lo mi amado wa.”

⁸ Agog en̄el sen ta, in̄ en̄el imug ipalu yan irig ipalu da. En̄el murna yan igo ibol, “Taun tubun ak Babilon dubilig idu geig go digane itout a. Taun Babilon nek amaiak, in̄san jeit kagin dabai an niḡen o, tamolpein warou fidian duri dupani na ya. Nek ibol wain dabai ak ipidinaig duluk go burau geig dilasa yak igo woḡ a.”

⁹ Eñel sen ta eñel uraru dupalu dugo patud fo ipalu yan, awan dabai geig iwagin go ibol, “Talpein ta in mel kasik en inñsan mitilaen da sad ubou leil igane dop, agod in naon fo, tia, banin te, kob inane tap, ¹⁰ aria, in gidad wain naon sen ak ka iluk a. Wain en man Anut san ilo wananan agod Anut in wain en you da ta ibilisa dop, tia, wain an inanen ilo mumarek san gab lo iwali wa. Ago dop talpein en ka iluk a. Ago dugup eñel gun ak malad lo, Sipsip Nanun malan lo dam, talpein en in yai lo, agod pat salfa inani dak lo, madai inanep ago imado yau a. ¹¹ Ago dugo yai a madai tubun geig ipidinai dan san yakas pempem mi lak na isuda yau a. Tamolpein emaiak in mel kasik, inñsan mitilaen da sad ubou leil digane da, agod inñsan yanñsan san kob diñane dop, ad lo tidom lo dam inaned madai niñen o yaes bilabal amad tia wa.” ¹² Saen an lo tamolpein gun ak gidad dumado dabai a. Tamolpein a Anut awan paen na dumado dugo inaned ilo rumok Jesus lo diabi sakar dan nek an mi a.

¹³ Agog ñai talpein ta kumaen panu lo igo iwagin dugo awan ñalon a. “On ru igo gire wa. Gamu agod nal murna san dam fidian, tamolpein a Tubun en lo dumado dop dumat tap, in ka uyad isusa wa.”

Ago dugo Awan Urgan ru naon igo ibol, “Rumok geig, in ka uyasusai digane wa. Inanen urat dabai ak dibiseip ka yaes dubal a. Man dugo, ata urat digane yan san nuñon imug mi ilasa yan in dida kumaen panu lo diau a.”

Tan en lo anañ ñilañal san nal idu ya

¹⁴ Aria, ñai malag yau dugo, naog na timtaen milkouk ak kisaek ñile ya. Ago dugo talpein ta

tamol nanun igo won an fufo na imasig imado se ya. In kitikat gol aman da yak kabunan fo yen dugo, banin lo man bubarek luon geig ak yabi se ya. ¹⁵ Ago man enel sen ta Anut san ubou ab patun fo ilasa ya. In awan dabai geig talpein timtaen lo imado dan san na iwagin go ibol, “Onane bubarek nane anan tute idu wa. Anan tumanek san saen ilasa la ya, an ninen o tan na anan fidian ibes pasik a.” ¹⁶ An lo man talpein a timtaen fo na imado dan, inanen bubarek yabig, tan na itakoksig abi lo anan ibes ak itute idug itumani dugo isini yau a.

¹⁷ Agog enel taidam bubarek luon geig ak yabi dan, kumaen panu lo Anut san ubou ab patun fo ilasa ya. ¹⁸ Agog enel sen ta alta ibiseig kuai te ilasa ya. In man alta san yai itirni san dabai aman da ya. In awan dabai geig enel bubarek luon ak yabi dan iwagig ibol, “Onane bubarek nane, wain patun abi a tan na yak lo yan tutep tumani wa. Man dugo, wain patun fidian dulubon la ya.”

¹⁹ An lo man enel en inanen bubarek inane, tan na itakoksig, wain kutubuk itartiti idug itumanig dien da. Ago man in wain patun an, pat bod tubun ak ilon lo tamol wain patun nedi nam dupartitale wo isuwari idu ya. En man Anut san ilo mumarek itutunani a. ²⁰ Agog Jerusalem san ar patun fo, wain nunon bod lo dupartitale dugo dar bod an lo imaspalug kuai te ilasa ya. Ago dugo dar an imaspalu yau se ya, in san milaen man 300 kilomita igo won, tan fidian ituani a, agod in san kuror man mita kisaek wadan da igo won a.

Daeg seven ilod lo muruan murnai san dien da

¹ Aria, ηai kulob naon senamo geig ak kumaen panu lo ilasa dugo ηile ya. Mel an man tubun a, an niηen o ηumasa saian go an lo dam ηarut saian geig da. ηai ηηel seven dutur dugo banid lo muruan seven a murnap tamolpein daon dupidinai san duburou dan ηeil a. Agod saen kulob saiak saiak en itout dop, sen ta ilasa san tia ya, man dugo, muruan seven emaiak lo Anut san ilo mumarek itout pasik a. ² ηai mel ta nek ibol beig tubun ak galas on, yai lo dukubuli ak ηile won ηa. Tamolpein a yu digane itout an, gubak mi mel kasik ak, iηanen mitilaen agod yanηan san sutek dam dibiai dudu yan dam ηeil a. Tamolpein amaiak iη beig galas on an giranηen na dutur dugo, iη melmel gita igo won Anut ipidinai an duburou se ya. ³ Tamolpein an Anut san urat tamol Moses, agod Sipsip Nanun da sad bar diabi se ya. Bar an man igo ya.

“O Tubun en, on Anut, dabai fidian ama da ya.

Urat fidian on gane man tubun a. Maη mile dugo, iloma weiwei da.

O Anut, on tamol warou fidian sad kiη, onane kulob fidian itaot di rumok geig a.

⁴ O Tubun en, enti on yanηa niηen o ta irer na wak i?

Enti on yanηa yabisa wo imoi ak i?

Man dugo, on mi gun a.

Tamolpein tan titin fidian lo dumado dan dupalup on ubou ama dile wa.

Ata wo, onane kulob naok naok itaot mok an, gamu kuai tem walal isig, tamolpein fidian dile da.”

⁵ Mel an itout go, kumaen panu lo kontrak san ab sel dalawan dupasig yen dan n̄ile ya. Ilon lo galuŋ a yaŋan aben gun di gun geig ak dubol dan n̄ile ya. ⁶ Ago dugo eŋel seven e muruan seven daon panek san duburou dan galuŋ an dibiseig kuai te dilasa ya. Inj kulos milkouk irafuleg ikokan geig ak dupulau a, agod let gol titired fo diganeg ilubani a. ⁷ Aria, mel iwoiwo a kumaed dumado dan, luluŋad lo kisaek inj gol daeg seven eŋel an ipidinai a. Anut e kumaen pempem imado yau den, inŋsan ilo mumarek an daeg a seven an lo inawai a. ⁸ Ago dugo tempel san galuŋ gun di gun geig ante man, Anut san girager di dabai tubun ak yakas igane ilasa dugo yakas an aben an lo awan isa ya. Talpein ta inj galuŋ gun an lo iladu san tia ya. Tia, inj eŋel seven an malad digane dop muruan seven an san urat digane itout gup a.

16

Eŋel seven muruan daeg seven duwalig idu ya

¹ Aria, ŋai awan ta ubou ab san galuŋ gun an lo ilasa dugo ŋalouŋ a. Inj awan dabai geig eŋel seven en igiai dugo ibol, “Anj aup, Anut san ilo mumarek daeg seven lo yan awali tan na idu wa.”

² Ago man eŋel malan te yan yaug inŋsan daeg iwali tan na idu ya. Agog tamolpein mel kasik ak san kob diŋane dugo inŋsan mitilaen ubou an dile dan, baob saian geig ak wei mi sad na ilasa ya.

³ An itout go eŋel neinta inŋsan daeg iwalig beig lo idu ya. Ago man beig ibilisag, tamol dumat ak sad dar igo won ilasa ya. Ago man melmel fidian beig lo kumaed dumado dan dumat pasik a.

⁴ Enjel a enjel uraru tinid te imado dan inj dam injsan daeg iwalig, you fidian dog lo yau dak lo, agod you fidian gib lo ibanai ilasa dan lo dam idu ya. You an fidian dubilisag dar igo won dilasa ya.

⁵ An lo naj enjel a tan san you fidian itirnai dan igo ibol dugo najon a.

“O Tubud Gun, on gubak mi mado yak, agod gamu dam mado da.

Naon saian geig amaiak on tamolpein pidinai an itaot mok a.

⁶ Tamol warou en onane tamolpein agod profet adi dufu dumat dugo, injsad dar ikulmaek a.

Amaiak njen o on talpein a saiadi amaiak dar en dulok o pidinai a.

Dar e dulok den man, injsigand kagin saiak saiak san naon itaot ak dinane da.”

⁷ Agog naj alta igo iwagin dugo najon a.

“Awo Tubud Anut, on dabai fidian ama da ya.

Tamolpein a saiadi an sad urat naon on pidinai man rumok di itaot mok a.”

⁸ Aria, enjel a enjel utol tinid te yan injsan daeg ad fufo ikulmaek a. An lo ad san wananan isida yan, tamolpein e tan na dumado den tinid inani saian geig a.

⁹ Ad san yai tubun an man wananan geig a, an lo tamolpein fidian tinid inani se ya. Ago man tamolpein an Anut yan lo ru saiak saiak dubol se ya, man dugo, inj dulon uyanan ak man, Anut mi muruan a dile dan itirni se ya. Ago bo man inj ilod dibilsag Anut yan ta diabisa na ya.

¹⁰ Agog enjel a enjel iwoiwo tinid te yan injsan daeg ikulmaek go, mel kasik malan te yan san kalik fo idu ya, an man kin san kalik. Ago dugo tamolpein a mel kasik san kagin panek paen na dumado dan,

sad na tidom ilasag ituanai a. Agod tamolpein an madai tubun geig ak lo inşed baled diani se ya. ¹¹ Inşigned madai agod baob tinid fufo ilasa yan dam nişen o inş kumaen panu san Anut naon dufute dupei na ya. Ak gug inş ilod ta ibilisag, kagin saiak saiak digane na yan dam ta dubusei na ya.

¹² Agog eşel a eşel kafenda tinid te imado dan, inşan daeg you tubun ak Yufretis fufo iwalig idu yan lo, you an igos yau a. An lo kiş adi ad ilasa san başen lo dupalu san dal ikubune ya. ¹³ Agog ņai ur saiak saiak utol gurogurou igo woş ņeil a. Inş mot tubun ak awan lo, mel kasik ak awan lo, agod profet sewak awan lo dilasa ya. ¹⁴ Ur adi emaiak mi inş ur saiadi a. Inş kulob girager naon sensen digane wo, dufurak go tan fidian sad kiş sad na diau da. Inşad urat man, kiş fidian inşaned yu tamol adi dutumanai o digane da, an lo dop Anut dabai fidian aman da tamolpein kot ipidinaş san nal tubun ak lo, yu diabisa wa.

¹⁵ Agog Jesus igo ibol dugo ņaloş a, “Ale. ņai nek ibol gumagam tamol ipalu dak igo woş, anşam na ņupalu wa. Amaiak nişen o talpein inş ņioş ta yabi na dop, inşanen kulos giraşen na idirig imado dan, ka uyan isusa wa. Nal a ilasa wan san saen lo, kabelan inş nuşon kawan itor dop tamolpein inşan miai dile banau.”

¹⁶ Aria, ur saiak saiak kiş adi dişal dupalug aben ente dutumanai a. Aben en Hibu ru lo Armagedon dubol da.

¹⁷ Agog eşel a eşel sukun tinid te imado dan, inşan daeg keit lo iwalig idu ya. Ago dugo awak dabai geig inş galuş gun di gun geig ak Anut san ubou ab ilon lo yen dan lo ilasa dugo igo iwagiş,

“En man itout a!” ¹⁸ Ago man weil wei mi irafule dugo, liliñan tubun mi dunur a, ago dugo weil diliñan ak, kanaurig tubun ak dam ilasa ya. Kanaurig an man tubun geig a, kanaurig naok igo yak ta, saen tamolpein imug tan na dumado ipalug gamu yen sad na ilasa man tia ya. ¹⁹ Aria, taun tubun ak itarpaleg lapan utol dilasa ya. Agod kanaurig amaiak tamolpein tinidi naon sensen ak sad taun tubun an fidian iratitale yau a. Agod Anut in taun tubun ak Babilon niñen o ilon isoug, an lo gab a ilon lo wain awan isa yan inañeg Babilon ipani a. Wain an man inañen ilo mumarek tubun geig an tou ipani da. ²⁰ Ago dugo nui fidian dusol go diau pasik a. Agod did fidian dam talpein ta yil san tia ya. ²¹ Ago dugo ais tubun ak dudu ya. Ais lapan kisaek kisaek sad muruan 50 kilogram igo won a. Keit lo ais an tamolpein tinid fufo dudu dugo daon tinan geig dupidinai a. Amaiak lo Anut o ru saiak saiak dubol se ya, man dugo, kulob an man ilo irer san geig a.

17

Jeit pein tubun an naon saian ak inane ya

¹ Ago man enel nuñod seven daeg seven diabi dan luluñad lo enel kisaek ñai Jon ñaisag na ipalug igo irupaiağ a. “On palup, jeit pein a you wei mi fufo imasig imado dan, naon dugo won Anut ipani wan nukubiaip ule wa. ² Tan san kin adi pein en da jeit kagin saen wei mi digane na ya. Tamol tan en san fidian in dam pein en da jeit kagin digane na ya. An lo man in fidian inañen jeit kagin san wain duluk na yan lo burau dilasa ya.”

³ Agog enel e ηai da miηinen den, ηionjamin Urgun igane ilasa yan lo ηai isinag go, in da aben kawan talpein an tia yak ate mau a. Aben an lo ηai pein kisaek mel kasik daran ak fufo imasig imado dugo ηile ya. Mel kasik an yanak wei mi tinin fo anua ya. Girek en lo yanak en fidian man, Anut niηen o uf ru funfun agod ru saiak saiak dam dien da. Mel kasik an kabunan seven dugo fai aman 10 kabunan fufo dilasa ya. ⁴ Pein en kulos a igane yan daran a, agod sad girager daran an naok uraru a, man dugo, girager uraru an kiη san a. In gol damag naon funfun, agod kululoi naon lak na yak, damag naon uyanan pat nam digane yak dam aman da ya. In gab gol aman da banin lo yabi da. Agod kagin naon sensen Anut malan lo iganan geig ak, pein en san jeit kagin nun anda yak gab en lo awan isag yen da. ⁵ Agod pein en naon kapen fo yanak ta digireg yen da. Yanak an man igo ya.

Ru mianuk an.

Babilon tubun a.

Jeit pein sad tinadi mok.

Agod tan san kagin iganan fidian sad muroud imado da.

⁶ Pein en Anut san tamolpein ifug dumat a, tamolpein nek Jesus yan an ilod lo rumok go, in san yan an dubol ilasa na ya. Pein en gubak mi insad dar iluk go, an lo nek ibol tamolpein ayu duluk pe burau digane dak igo won, ago burau imado dugo ηile ya.

Saen ηai ago ηile dugo ηumasa saian go ilo sou wei mi ηigane se ya. ⁷ Ago man enel an igo irupaiaig a, “Ata wo on masa saian ak i? Pein an, agod mel kasik ak isini dan, nek a fai aman seven dugo

kabuñan 10 aman da yan, sad fudi ñupano wa. Mitilaen en fun imianuk a, gug ñai ka ñufulale pano wa. ⁸ Mel kasik en oñ ule la ya, gubak mi imado yak, gamu fon ta imado na da. Ak man murnap inñ gib e fun tia yen ibiseip isuda wak gug, ideg yau geig a. Tan san tamolpein inñ mel kasik en dilep dumasa saian geig a. Nek tamolpein a inñaned yañadi Anut tan gamugo igane ilasa yan lo, kumaen san buk lo ta igire na yan, inñ dumasa saian a. Man dugo, mel kasik en gubak mi imado yak gug, gamu ta imado na da, ago bo man murna dop kumaen fon imul da wa.”

⁹ “Talpein inñ kankan milaen aman da tap, inñ ka mel en fun ilonñ uyanan a. Kabuñan seven en man, did seven emaiak fufo na pein a imasig imado dan ate tou ipani da. ¹⁰ Agod taida mi, kabuñan seven en man kinñ seven ate tou ipani da. Kafen ta gubak mi dumat la ya. Kisaek gamu imado da. Agod kisaek gamugo kinñ ilasa da. Saen inñ ilasa tap, inñ saen kitekan mi kinñ imado wa. ¹¹ Agod mel kasik e gubak mi imado gug gamu tia yen man, kinñ kisaek taida mi, gamu nuñod seven an luad isa da, ak man inñ kinñ nuñod seven an sad warou lo dam mi a. Agop inñ ideg yau a.”

¹² “Agod fai 10 en oñ gubak mi mel kasik en kabuñan fufo ilasa dugo ule man, inñ kinñ 10 ate tou dupidinai da. Inñ gamugo kinñ sad dabai diñane ya, ak gug murna dop kinñ sad dabai diñanep auwa kisaek mi mel kasik ak dida tamolpein ditirnai a. ¹³ Kinñ adi en man inñsad kankan kisaek mi a. Inñsad dabai agod yañad tubun ak da mel kasik an dupani wa. ¹⁴ Kinñ adi emaiak inñ mel kasik da Sipsip Na-

nun lo yu digane wa. Ak man Sipsip Nanun agod tamolpein a n̄ien aban duri dupani dan sisem yu lo dirin̄anai geig a. Man dugo, Sipsip Nanun man tamol tutubu yak sad Tubun a, agod kiñ fidian sad Kiñ, agod tamolpein a in̄ dida dumado dan man, Anut ipilianaig igiai a, agod in̄ awan kagin dupani da.”

¹⁵ Ago man eñel an foun mi igo irupaiag a, “On̄ you wei mi a gubak mi jeit pein fufo na imasig imado dugo ule yan, in̄ tamolpein fidian tamol sad warou adi, tinik naon sensen fidian, muroun ru fidian agod warou tutubu geig ak dutumanig dumado dan ate tou dupidinai da. ¹⁶ Mel kasik en, agod fai 10 e ule yen dam, in̄ sisem jeit pein an lo siai digane wa. In̄ pein an san biouñ fidian dupasi idup nuñon kawan ilasa wa. Agop in̄san tinin mudan diani dop yai lo dumarip inani yau a. ¹⁷ Man dugo, Anut in̄sen mi kiñ en kankan ipidinaip, an lo kulob a gubak mi Anut nin̄en o ilon ibol amaiak ka digane ilasa wa. In̄ ilo sou kisaek amad da wa. In̄ kiñ dumado san dabai e diñane yen, fidian mi mel kasik en dupani wa. In̄ ago mi digane dop yaup ru a Anut gubak mi ibol an fidian nuñon ilasa wa. ¹⁸ Pein gubak mi ule yan man, in̄ taun tubun e tan en san kiñ fidian itirnai den ate tou ipani da.”

18

Babilon saian igane geig a

¹ Murnag n̄ai eñel sen ta kumaen panu ibiseig idu dugo n̄ile ya. In̄san dabai man dabai geig a, agod ilalan̄ a in̄san nag irafule ilasa dan, tan ilalan̄

ipani sinʼaokan a. ² Inʼ awan dabai geig igo iwagin go ibol,

“Ale, taun Babilon tubun an dibildu ya, awo, Babilon dibili yau idu geig a.

Gamu inʼ man bugai adi sad yaes bilabal aben ago ilasa ya,

ur saiak saiak fidian sad wur igo ilasa ya,

agod anakanak di yok naok fidian nun amad da yan sad wur igo dam ilasa ya.

³ Ata wo, tamolpein warou fidian inʼ da inʼanen jeit kagin dabai ak san wain duluk a.

Tan san kinʼ adi dam inʼ da jeit kagin digane na ya.

Agod tan san dadenʼ tamol adi inʼ Babilon san ilo masai dabai ak san kagin lo moni wei mi dinʼane na ya,

an lo inʼanen jeit kagin an aenta sad irinʼanai geig an lo, tamol filiad tubun ak igo dilasa ya.”

⁴ Agog nʼai kumaen panu lo Anut awan igo ilasag iwagin dugo nʼalonʼ a.

“Anʼ nʼaineg tamolpein adi, anʼ gidad aben an abi-seip kuai te alasa wa.

Kabelan aupasek funfun a igane dan lo luan asa banau.

Agod kabelan anʼ inʼsan muruan funfun nʼai nʼupani wan ate dam atutou banau.

⁵ Man dugo, inʼsan aupasek itumanig malan tubun go kumaen panu lo isuda yau la ya.

Agod kagin saiak saiak igane na yan fidian ninʼen o Anut ilo sou igane da.

⁶ Inʼ aenta ipidinai ak igo Anut dam naon inʼ ipani wan man babagaru a.

Ayu naok dugo inanen gab lo yak Anut inanep,
 ikubulip, subujan taidam ililip, urarum
 iluk san ipani wa.

⁷ Nek ibol in girager agod mel wei mi sinjakan ak
 dam insen ipani se yak igo won,
 madai tubun geig agod ilo papao a Anut ipani
 wan da tou kisaek a.

In buben ago ibol, naj mi kwin, naj pein suos tia ya,
 amaiak ninen o naj tina aru njigane san tia
 geig a.

⁸ Amaiak ninen o, nal kisaek ilon lo mi, naon dugo
 Anut ipani wan ile wa.

Naon an man maten, mala turon, agod kadag
 san saen tubun a.

Yai man Babilon inani yau pasik a.

Man dugo, Tubud Anut e naon ipani den, in
 dabai tubun ak aman da ya.

⁹ “Tan san kin adi e gubak mi in da jeit kagin
 digane se yan, agod dida inanen ilo masai san
 kagin ate dututou se yan, yai a Babilon inani dan
 san yakas dile wa. In ago dile dan lo, taun an
 ninen o tina aru digane dop ilo muruan amad da
 dumado wa. ¹⁰ In madai saian ak inane dan dile
 dop ninen o direr geig a. In asau mi dutur dop igo
 dubol,

‘Ilog imunano, Babilon, ilog imunano geig da.

On tubu kasik agod taun dabai geig a.

Ak man auwa kisaek ilon lo mi onane aupasek
 naon saian ak onsa na ilasa ya!’

¹¹ “Daden tamol adi tan fidian san, Babilon
 ninen o tina aru digane dop, ilo muruan amad
 da dumado wa. Ata wo, inaned bioun didad san
 talpein tia ya. ¹² In sad bioun wog tubun ak lo

digane yau man, gol, silva, pat uyanan ak, kululoi naod lak na geig ak, yamel milkouk sinjaok amadi ak, yamel daran naon funfun agod yamel silika. Agod ai naon funfun sad mumaludi uyanan ak, agod melmel naon aenta elefan san buramat nam digane ya. Mel aenta digane man, ai naod tutubu yak lo, bras, ain, agod pat girager sinjaokan ak nam digane ya. ¹³ Inaned biouñ aenta dam dien da. Sinamon nesnes nuaen san, paura, yakas mumalun uyanan igane ilasa dak, guren naon funfun mumalun uyan ak, sanda uyan ak, wain, oliv guren, plaua uyan ak, agod wit da, makau, sipsip, hos di hos karis da, agod tamol bigabeg adi dam mi a.

¹⁴ “Tamol daden urat digane dan Babilon igo durupeï a. ‘Onane urat san nuñon a on nane wo ilo ibol na yan, an fidian on sinjire na tia ya, asau mi geig dien da. Melmel uyadi didaen san naon tutubu yak, agod onane biouñ bala sinjaokan ak an fidian dideg la ya. Ago yak ninen o on melmel en afon ule san tia geig a!’ ¹⁵ Tamol mel an lo daden digane na yan, in taun an san moni wei mi dinane la ya. In taun an madai tubun mi inane dop dile wa, ago dop in dam tubun mi direr a. In asau mi dutur pe tinañ aru digane dop, ilo muruan lo dumado wa. ¹⁶ In disasaip igo dubol a.

‘Tloma saian da, taun tubun an ninen o iloma saian geig da.

Gubak mi in kulos milkouk sinjaok amadi ak, yamel daran ak naon funfun tinin fufo idiri na ya.

In gol di pat sinjaokan, kululoi naon lak na geig ak ate bala yabi se ya.

17 Auwa kisaek an ilon lo mi, moni en in bioun en da fidian mi ideg yau a.'

“Wog tubun ak wei mi sad unbiek adi, agod tamol fidian wein diabi dan, wein tamol wog lo urat digane dugo tan tutubu yak lo dutor dan, agod wog tubun amaiak sad tamadi fidian mi, dutor pe asau mi geig dumado wa. 18 Ago dop in Babilon yai inani dak san yakas dile dop disasaip igo duwagin a, ‘Taun dugomaiak in taun tubun en da naon kisaek i?’ 19 In tan san gufgaf duburoup, sed kabunad fo dusuwarip, tina in aru digane dop ilo muruan amad da dumado wa. Ago dop in igo duwagin a,

‘Ilo ma imunan, o on taun tubun ak iloma tubun mi imunan da.

Wog tubun ak taman adi beig lo dutor dan, in taun amaiak san moni tutubu yan lo moni tamol dilasa ya. Ilo ma imunan da.

Auwa kisaek ilon lo mi saian gane geig a!’

20 “An kumaen panu san tamolpein, Babilon ninen o gidad uyasusai tubun mi agane wa!

O an gun adi, aposel adi agod profet adi uyam isusa wa.

Man dugo, Anut taun en san kagin ipupig ile yak ninen o naon saian ak ipani a.”

21 Ru an itout go, enel dabal ak kisaek pat tubun ak ta ate wit dufufari idu dak inane ya. In pat en yabisag beig lo ibildu ya. In igo ibol,

“Kagin amaiak lo in Babilon tubun an dinanep dubildu dop in fon ta dile geig na wa.

22 O Babilon, gita san lili in, dum san lili in, barag san agod dum wek naon funfun onsa ar lo fon ta ilasa na wa.

Onj lo tamol adi injsad urat pinein adi urat dugoma-
iak digane san manjau dupidinai man, fon ta
ilasa na wa.

Pat wit ifufari san ibob dan, inj fon onj lo ta ilasa na
wa.

²³ Lam san lilaman onjsa na fon ta ilasa na wa.

Pein tamol nug iwon iwon awad onjsa na fon ta
dulonj geig na wa.

Gubak mi onjane dadej tamol adi, inj tamol tutubu
geig tamolpein aenta malad lo dumado na
ya.

Onj nawir naon funfun gane dugo, an lo onj
tamolpein warou fidian rawai na ya.

²⁴ Anut taun en ilon lo abanj ile dugo dar tubun mi
kuai ipani a.

Dar an man profet adi agod injanen tamolpein
gun ak sadi a,

agod taun en ilon lo man tamolpein fidian a
gubak mi dufu dumat ak sad dar ikulmaek
idu yan dam ante yen da.”

19

*Tamolpein Babilon daonj injane yan dile yak ninjen
o uyasusai digane ya*

¹ Mel en itout go, naj mel ta waginj tubun ak igo
wonj kumaen panu san tamolpein warou tutubu
yak dubol dugo njalonj a.

“Aleluia,* id Anut per tupani wa!

Patud pasek, girager agod dabai da injsan mi a.

² Man dugo, injsan kot man rumok di itaot mok a.

* **19:1:** Hibru ru ‘aleluia’ san fun: Yawe per tupani.

In jeit pein tubun en, inanen jeit kagin lo, tamolpein tan san fidian mi inaned madok malan isue dugo nun dilasa yan, yabi idu ya. An lo naon itaot ak ipani a.

Pein en inŝan aupasek lo Anut san urat tamol di urat pein ifug dumat an lo aupasek amaiak gamu naon ipani a.”

³ In fon mi igo duwagin a.

“Aleluia!

Taun tubun en yai inani da, amaiak san yakas pempem mi lak na isuda yau da.”

⁴ Matu gurman adi 24 in mel iwoiwo kumaed dumado dan dam, Anut kin san kalik fufo imado dan, naon na turud dusoluwig in ubou an dile ya. In igo dubol a,

“Rumok. Aleluia, man Anut per mupani da!”

⁵ Agog talpein ta awan kin san kalik lo ilasag igo iwagin go ibol,

“An idsad Anut san urat tamolpein, an Anut per apani wa.

An tamolpein kawan ak,
agod tamolpein yanad anda yan,
an fidian mi gamu Anut yan an abisa wa!”

⁶ Agog nai liliŝan tubun ak nek ibol tamolpein warou adi dutumanig dumado dugo sad ru ilasa dak igo won ŝalon a. An man nek ibol you wei mi sad liliŝan ilasa da, tia, weil tubun mi iliŝan dak igo won a. In igo duwagin da,

“Aleluia, id Anut per tupani wa.

Ata wo, idsad Tubud Anut dababai fidian mi aman da yak, gamu kin rumok imado da.

⁷ Gamu id ilod uyan pe yousai tubun mok tigane wa.

Ata wo, Sipsip Nanun in iwon pein inane san nal idu ya,
 agod in san pein sen bala ipanig malan igane da.

⁸ Anut ilon ibol an lo man, kulos milkouk sinjakaan geig ak pein an inane idiri a.

Kulos en ikokan di lilaman geig a.”

(Kulos e milkouk sinjakaan en, in Anut san tamolpein sad kagin itaot digane na yan ate tou ipani a.)

⁹ Agog enel an igo irupaiaig a, “On ru igo gire wa. Talpein e Sipsip Nanun pein inane san anan tubun ak lo Anut igiaig dupalu yen, uyasusai digane wa.” In fon mi igo irupaiaig, “Ru en man Anut san ru rumok a.”

¹⁰ An lo gug nai enel en sinjiren na turug nusoluwig in ubou an nile wo da. Ak man in igo irupaiaig, “On gidad ago ta gane na wa. Nai man on tei murou nek a Jesus ninen o ru diabi dabai dan dida, id sisem urat kisaek a. On Anut mi ubou an ule wa! Man dugo, idsad ru Jesus ninen o tabol ilasa dan, nek an mi profet adi sad ru fun mok a.”

Jon in tamol hos milkouk ak fo imado dugo ile ya

¹¹ Nai kumaen panu awan ipasig, hos milkouk ak imado dugo nile ya. Tamol a yan an Uyan di Rumok dubol dan hos an fufo imasig imado se ya. In kagin itaot mok an lo mi tamolpein kot lo ibitiniai dak agod yu igane da. ¹² Inanen malan man yai ided on da, agod in kin san kitikat wei mi kabunan fo dien da. In tinin fo yanak kisaek girek a, agod in sen kisaek mi yanak an ilon a, tamol aenta man tia ya. ¹³ In kulos igane dan gubak

mi dar lo dusomini a. Agod in yan an igo dubol, Anut san Ru. ¹⁴ Kumaen panu san yu tamol adi, agod yu pein adi dam, insiganded hos milkouk ak fo dumasig nien aban dirig patun fo dida dupalu se ya. In kulos milkouk sisiŋaok amadi ikok geig ak didiri a. ¹⁵ Sabiri kisaek luon geig ak ta tamol an awan lo ilasag gidigheid yau se ya. Sabiri an lo in tamolpein warou fidian ibiai dudu wa. In makud ain yabip, an lo tamolpein warou fidian itirnai dabai a. In pat bod tubun ak lo wain patun ipipi wo ipartitale wa. Wain an man Anut dabai fidian aman da yan san tinŋae mumarek tubun geig ak ate tou ipani da. ¹⁶ In san kulos milaen an fo, agod nien dam fo yanŋak en digire ya.

Kinŋ fidian sad Kinŋ,
agod tamol tutubu yak fidian sad Tamol Tubun a.

¹⁷ Agog ŋai eŋel kisaek ad malan lo itur dugo ŋile ya. In awan dabai geig lo anakanak keit titiŋaem durou dan igiaig igo ibol, “Anŋ apalup atumanip, Anut san ananŋ tubun en malan agane wa. ¹⁸ Anŋ kinŋ adi sad tinidi, yu tamol sad yu gurman dababai ak, hos agod tamol hos fufo dumado dan, tinidi ka ani wa. Anŋ tamol fidian, tamol sen ka bigabeg dumado dan, tamol kawan dutor dan, tamol gidigheid ak, agod tamol yanŋad aman da yak, sad tinid mudan ani wa.”

¹⁹ Agog ŋai mel kasik en, agod tan san kinŋ adi agod sad yu tamol dida dupalug dutumani dugo ŋeil a. In dutumanig an lo Tamol e hos milkouk ak fufo imado den, inŋanen yu tamolpein dida in lo yu digane wo da. ²⁰ Ak man Tamol e hos milkouk ak fufo imado den, mel kasik an yabig isubani

a. Profet sewak an dam yabig isubani a. Profet sewak en mel kasik an naon na kulob girager wei mi idiri ilasa na ya, an lo tamolpein a mel kasik an san kob inane dugo, san mitilaen dam ubou an dile yan, irawai se ya. Agog mel kasik in profet sewak da, nuṇod uraru kumaed dumado dugo, gib saltek tubun en lo pat salfa awan isag, inani dak lo diabibol dudu ya. ²¹ Ago dugo Tamol e hos fo imado den, inṣan sabiri awan lo yen dan ate, mel kasik san yu tamol ifug dumat pasik a. Agog anakanak adi fidian yu tamol adi sad sisanun dianig, luad ikafut idu ya.

20

Kristus anaṇar 1,000 tan na tamolpein itirnai a

¹ Ago man ṇai eṇel ta kumaen panu ibiseig tan na idu dugo ṇile ya. In banin lo man gib kuror fun tia yak san ki yabi dugo sein tubun geig ak ta dam yabi a. ² Eṇel en tan na ilasa dugo mot tubun en yabi a. Mot en man wagam geig ak san, yaṇan Satan dubol da, yaṇan taidam Uf Ru San Ur ago dubol da. Aria, eṇel en yabig sein nam isubanig, subanek lo anaṇar 1,000 ago imado wa. ³ Eṇel en Satan ibal gib kuror fun tia yak lo idu ya. In gib en san dalawan ifutanig lok iganeg dabai geig dugo, Satan kuai te ilasa san tia geig a. An lo Satan fon tamolpein warou fidian dumado dan irawai san dal tia ya. Satan gidad malan igane dop, anaṇar 1,000 yau gup, dubuseip kuai te ilasap saen katukan mi gidigheid itor a.

⁴ ṇai kalik wei mi ṇeil a, in nek ibol kinṇ adi sad kalik igo woṇ a. Ago dugo tamolpein kalik an fufo

dumado dak n̄tudi dam n̄eil a. Anut in̄ tuod lo tamolpein bitinaek lo didiri san dabai ipidinai a. Tamolpein en Jesus o ilod lo rumok, in̄san ru diabi sakar dugo, dubol ilasa na ya. In̄ dam mel kasik an, agod san mitilaen dam ta ubou an dile na ya, agod mel kasik an san kob man, in̄ banid fo, tia, in̄ naod kapen fo ta diñane na ya. Fun amaiak nin̄en o ager adi burodi dutute dugo dufu dumat na ya. Tamolpein emaiak fon kumaed dumasag kin̄ igo woñ Kristus da sisem anañar 1,000 dumado na ya. ⁵ Aria, en man tamolpein mutou lo yak foun dumasa dak sad saen malan te ya. (Tamolpein aenta dumat la yan, in̄ saen an lo kumaen ta dumasa na ya. Saen anañar 1,000 itout gup, tamolpein an kumaen dumasa wa.) ⁶ Tamolpein malan te mutou lo foun dumasa dan, ka ilod uyanan pe uyasusai tubun mi digane wa. Mateñ murnai san man, tamolpein naok amaiak ibiai dudu san dabai an tia ya. Tia, in̄ Anut Kristus da sad pris adi ago dumado wa. Ago dop in̄ Kristus da anañar 1,000 en lo tan na tirnek tamol igo dumado yau a.

Anut Satan daon̄ ipani a

⁷ Aria, saen anañar 1,000 en itout dop, gib kuror fun tia yak ate Satan subanek lo imado dan awan dupasip subanek ibiseip ilasa wa. ⁸ Satan tamolpein a tan titin fidian lo dumado dan irawai o kuaì te ilasa wa. Tamolpein an man Gok in̄ Magok da sad warou adi. Satan itumanaip yu diabisa wa. In̄sad yu tamol sad sutek man loñ na lul igo woñ a. ⁹ Yu tamol an tan titin fidian lo dupalup tan aten fo turen̄ diabip, gun adi sad aben agod taun tubun ak e Anut nin̄en o imat den ate dilasap disalti wa. Ak

man, yai kumaen panu lo yan idup, yu tamol adi an inanai pasik a. ¹⁰ Agog Satan gubak mi rawek igane se yan diabip, yai saltek a pat salfa ided dan ilon lo dibili idu wa. Ante man mel kasik ak in profet sewak da gubak mi diabibol dudu la ya. Ago dop nuḡod utol an ad tidom pempem mi madai dam muruan dam disini wa.

Kot tubun ak ilasa ya

¹¹ Agog ḡai kalik tubun milkouk ak, agod Enti in kalik fufo imado dan dam ḡeil a. Tan keit da in naon na dien san ta idaisuda na ya, an ninen o dusol diaug itout yau a. ¹² Ago dugo ḡai tamolpein yaḡad aman da yak, tamolpein kawan a dam dumat la yan ḡeil a. In kin san kalik naon na dutur se ya. Kot san buk awad dupasi dugo, buk taidam awan dupasi a. An man kumaen san buk. Gubak mi kulob dugo dugo tamolpein digane na yan, an fidian buk lo digire ya. Aria, gamu Anut in buk an ilod lo ile dugo, ru dugo digireg yen den iri panim, ago mi tamolpein dumat la yan sad kagin naok naok atem, naon atem itaot mok ipidina se ya. ¹³ Tamolpein ensauta beig lo dumat go ate dumado dan, in dumasag beig dubuseig kot lo diaug dutur se ya. Tamolpein ensauta a Mateḡ in Ades da lo dien dan, in dam dumasag kot lo dutur se ya. Ago dugo Anut tamolpein an fidian mi sad kagin dugo dugo tan na digane na yan bitinaek lo idirai dugo naon ipidina a. ¹⁴ Agog Mateḡ Ades da yai saltek an lo diabibol dudu ya. Yai saltek an man mateḡ murnai a. ¹⁵ Tamolpein fidian yaḡad kumaen san buk ilon lo ta yen na tap, yai saltek lo diabibol dudu diau a.

21

Anut melmel fidian idiraig foun dilasa ya

¹ Njai malag yaug keit foun ak inj tan foun ak da dien dugo neil a. Tan wagam ak inj keit wagam ak da ditout diau la ya, agod beig dam itout yau dugo foun ak ta aben injane man tia ya. ² Njai Anut san taun tubun ak njile dan man, Jerusalem foun a. Njai malag lo Jerusalem foun an Anut san kumaen panu ibiseig idu se ya. Insan bala man uyanan geig a, nek ibol pein tamol injane wo damag dupani ak igo mi a. ³ Ago dugo kinj san kalik fo na talpein ta awan dabai geig ak, igo iwaginj dugo njaloŋ a. “Alonj ak, gamu Anut injanen tamolpein lulunjad lo imado da. Inj dida sisem turenj diabi wa. Tamolpein en man Anut san warou mok a. Anut injen mi dida dumado wa. ⁴ Inj tamolpein an malad turon isasi pidinai dop fon ta dumat na wa. Inj ilo muruan dam tinaŋ dam tia wa. Inj madai fon mi ta dile na wa. Man dugo, melmel wagam ak san man gamu itout geig a.”

⁵ Enti a kinj san kalik fo imado dan igo ibol, “Alonj ak, njai melmel fidian njidiraig foun ak dilasa wo da.” Inj fon mi igo ibol, “Onj ru en gire wa. Ru en man rumok geig a. Tamol fidian ru en ka ilod lo rumok a.”

⁶ Agod inj igo njai irupaiag a, “Melmel fidian dilasa la ya. Njai mi malan te njumado dak, ago mi murna dam njumado wa. Njai mi fun, agod njai mi wadan. Gidad talpein ta kulagun igos dop, njai you kumaen san e sen ibanai den njinanep, naon tia kawan njupanip iluk a. ⁷ Talpein enti yu igane itout dop mel en fidian inj sad tamad imado wa. Njai man

inanen Anut, agod in dam naineg nanug mok a.
⁸ Ak man, talpein a direr dugo dusuk dumul dan, talpein a inaned ilo rumok patud dupani dan, a kagin saian geig nun anda yak digane dan, talpein a dufu dumat dan, a jeit kagin digane dan, a nawir digane dan, a tubud sewak adi lo dugudani dugo sad ubou leil digane dan, agod tamolpein fidian ru sewak dubol dan, inaned aben man, yai saltek pat salfa lo ided dan ate dumado wa. En man materj murnai a.”

Jon Jerusalem foun ak ile ya

⁹ Enjel seven injad daeg lo muruan seven a tamolpein malad isue san awan isa yan diabi da. Aria in lulunad lo enjel ta kisaek naisag na ipalug igo irupaig, “On palup, nai nug nanek san pein nukubiaip ule wa, an man Sipsip Nanun san pein.”

¹⁰ Ago dugo enjel en, njonamin Urgun igane ilasa yan lo nai isinag go, in da did tubun lak na geig ak fo mau a. Ante man in taun tubun gun ak Jerusalem ikubiaig nai nile ya. An Anut san na kumaen panu ibiseig idu dugo leil nupani se ya.

¹¹ Anut san lilaman girager tubun an naon senamo geig taun an lo irafule dugo aban kuai isi a. An nek ibol pat sinjakaan yanjan jasper naon lak na geig ak igo won a. Pat jasper san lilaman man pat daran di kadabog, agod mum igo won ided da, sinjakaan geig man nek galas on a. ¹² Taun en man injan ar tubun di lak na geig a. Injan dalawan 12 ar ate dien da. Enjel 12 dalawan an sinjered na dutur se ya. Agod Isrel gugoi 12 sad yanjadi dam dalawan ate digireg dien da. ¹³ Ar en san titin ad ilasa dak lo man, san dalawan utol a. Injan titin not lo man

dam dalawan utol, saut lo dam utol a. Ar titin ad idu yau dak lo an dam utol a. ¹⁴ Pat 12 taun en san fun dabai dupanig dien da. Sipsip Nanun san aposel 12 an yañadi dam pat en fo na digireg dien da.

¹⁵ Agod enjel e ñai da mukubiai den, makud gol ta lo tou igane san aman da ya. Inj taun tubun en, agod inşan ar, agod ar san dalawan dam touad igane wo da. ¹⁶ Taun tubun en san giranjen iwoiwo yan san tou man naon kisaek a. Inşan milaen inşan tubun dam tou naon kisaek mi a. Enjel makud an nam taun tou yabig, san tou man 12,000 kilomita igo woñ a. Taun giranjen iwoiwo yan, san lak na dam fidian sad tou naon kisaek a. ¹⁷ Inj taun an san ar tou yabig, ar san bubañan san tou man 144 mita igo woñ a. ¹⁸ Taun an san ar man, Anut gubak mi pat siñaokan daran di tinin mum ak nam igane ya. Taun inşen man Anut gol nam igane ya, siñaokan geig di ibol galas oñ a. ¹⁹ Taun an san ar fun man, Anut pat sensen naod lak na yak nam damag ipani a. Pat siñaokan ar fun te man jaspas. Tinin te man pat yedyed ak yañan safaya. Ta man pat girager wei mi dukubuli dan yañan aget. Ta man pat mum ak yañan emeral. ²⁰ Pat kafen ak san girager man daran di milkouk da, yañan onikis. Pat sukun an man daran, yañan konilian. Pat balab man kadabog, yañan krisolait. Pat mum ak ta man naon sen ak ibol beig oñ yañan beril. Ta man pat kadabog ak yañan topas. Ta yañan krisopres, san girager kitek mum oñ a. Ta yañan aiasin, san girager man daran di kadabog da dukubuli a. Ta yañan ametis, san girager man ibol daran di yedyed da dukubuli igo woñ a. ²¹ Dalawan 12 en

man, kululoi milkouk 12, sad naod man lak na geig a. Dalawan kisaek kisaek atem kululoi tubun ak kisaek kisaek nam digane ya. Taun san dal malan te yak gol nam digane ya, agod san leil man nek ibol galas onj a.

²² Nai ubou ab ta taun en lo yen dak njile man tia ya. Tia, Tubud Anut inj dabai fidian anda yan, Sipsip Nanun da injsed mi ubou ab san aben dijnane ya. ²³ Taun en lo ad inj kalam da lilaman digane san urat amad tia ya. Tia, Anut san ilalanj tubun an mi lilaman ipani da. Agod injsan lam man Sipsip Nanun mi a. ²⁴ Tamol warou fidian man taun en san lilaman lo dutor a. Ago dop tan san kinj adi injaned filiadi an disinip injsan na dupalu wa. ²⁵ Ad lo inj ar san dalawan ta dufutani na wa. Tidom fon taun an lo ta ilasa na wa, an lo man ar san dalawan pempem mi ikasap dien a. ²⁶ Tamolpein warou fidian sad melmel girager amad da yak, agod mel uyanan dam disinip taun an lo diladu wa. ²⁷ Mel ta nun anda yak taun an lo ta iladu na wa, tia geig a. Tamolpein a miai kagin, agod rawek kagin digane dan dam ta diladu na wa. Tia, tamolpein a injaned yanjadi Sipsip Nanun injanen kumaen san buk lo digire yan mi ka diladu wa.

22

You kumaen san agod ai kumaen san

¹ Agog enjel en naj you tubun ak ta ikubiaig njile ya. You en kumaen san, injsan lilaman nek ibol galas onj a. You en Anut inj Sipsip Nanun da sad kalik paen na ilasa dugo, ² taun titinjae mi yau da. You san awan gigin aenta lo agod aenta lo dam ai kumaen san dutur da. Inj ananj ar kisaek ilon

lo saen 12 nuḡod dufu da, kalam kisaek kisaek ate mi. Ai roudi an tamolpein subam ad da yak ikubunia i san. ³Mel ta Anut san misilane k ru paen na yen dan taun en ilon lo ta yen na wa. Anut iḡ Sipsip Nanun da sad kalik kisaek an mi taun an lo yen a. Ago dop Anut san urat tamol, urat pein dam iḡ lo ubou dile wa. ⁴Tamolpein en Anut naon ka dile wa, agod iḡ yaḡan man naod kapen fo igirep yen a. ⁵Tidom fon ta ilasa na wa. Lam iḡ ad da lilaman digane san urat amad tia wa. Tia, Anut iḡsen mi iḡsad lilaman. Agod iḡanen tamolpein an iḡ kiḡ agod kwin dilasap pempem mi ago dumado wa.

⁶Eḡel e ḡai da mukubiai den igo irupaiag a, “Ru en fidian man rumok geig a, tamol fidian ru en ka ilod lo rumok a. Agod Anut Tubun ak iḡ profet ḡtudi sad Anut, iḡanen eḡel idinig urat tamol adi agod urat pein dam, mel fidian mitep ririan dilasa san ikubiai pidinai o ipalu ya.”

Jesus ririan imul ipalu wa

⁷Jesus ibol, “Aloḡ uyan. ḡai aḡsam na ḡupalu san saen sumeik la ya. Aria, talpein ta Anut san ru murnap ilasa san buk en lo yen den iri ipani dan, uyasusai ka igane wa, man dugo, iḡ bar uyanan iḡane wa.”

⁸ḡai Jon, ḡai ru en ḡaloḡ dugo mel fidian dam malag nam ḡile ya. Agod saen ḡai ḡaloḡ dugo ḡile yan man, ḡai eḡel emaiak mel e fidian ikubiag ḡile yen, ḡien fun na turug ḡusoluwig iḡ lo ubou ḡile wo da. ⁹Ak man iḡ ḡai irupaiag, “Oḡ gidad ago ta gane na wa. ḡai oḡ da urat kisaek a. Taida mi, oḡane tei tao profet adi, agod tamolpein a buk en san

ru diganuri dan maŋ dida urat kisaek a. Anut mi ubou an ule wa!”

¹⁰ In fon mi ŋai igo irupaiaŋ a. “Profet ru buk en lo yen den, oŋ ta pirani na wa. Tia geig, man dugo, ru en nuŋon ilasa san nal man ipalu sumeik a. ¹¹ Saen katukan ak niŋen o, talpein kagin saiak saiak digane dan in ago mi ka digane wa. Talpein kagin nun aman da yak digane dan, in dam ago mi digane yau a. Talpein kagin itaot digane dan, kagin nek ago mi ka digane yau a. Agod gun adi dam inaned kagin gun an mi ka digane yau a.”

¹² Jesus igo ibol, “Alon ak, ŋai ŋupalu san saen sumeik a. ŋai tamol fidian inaned urat emaiak san naon ŋupidinai san ŋisinip ŋupalu wa. ŋai tamol kisaek kisaek urat dugo dugo digane na yan atem itaot inaned urat naon ŋupidinai a. ¹³ ŋaiseg mi imug ŋumado yak, agod wadan lo dam ŋumado wa. ŋai mi malan te ŋumado dak, ago mi murna dam ŋumado wa. ŋai mi fun, agod ŋai mi wadan.

¹⁴ “Tamolpein inaned kulos dufulani la yan, in uyasusai digane wa. In ai kumaen ipidinai san an ate anaŋ ka diŋane wa. Agod in taun san dalawan lo ka diladu wa. ¹⁵ Ak man goun adi agod tamol adi a nawir digane dan, tamol jeit kagin digane dan, tamol dufu dumat dan, a tubud sewak lo ubou dile dan, tamol fidian a kagin sewak duri dupani dan, tamol naok amaiak taun san ar patun fo dumado wa.

¹⁶ “ŋai Jesus, ŋai gubak mi ŋaisag eŋel ŋidinig aŋsam na yau a, an lo ru e aŋ Kris midaeŋ adi alon la yen irupaiaŋ a. ŋai man kiŋ Dawid san ai dabin, agod inŋsan malan kubulan. ŋai man patui nek a salso idu dop ided dan nek ama ya.”

¹⁷ Awan Ur in Sipsip Nanun san pein da Jesus durupeig ago dubol, “On palu.” Agod talpein enti buk en lo ru ilon dan in dam ka ibol, “On palu.” Talpein enti kulagun igos pe iluk o imat dop, in ka ipalup you kumaen san an naon tia kawan inane wa.

¹⁸ Nai ru dabai nam tamolpein fidian a profet ru buk en lo dulon an nrupidai da. Talpein enti buk en lo ru sen ta ibate dop, aria, buk en lo mel saian geig Anut ninen o ibol en, Anut in sen mi ibatep talpein an san na ilasap isini wa. ¹⁹ Taida mi, talpein ta in profet ru aenta buk en lo yen den ipasi yau dop man, muruan naok en in isini wa. In ai kumaen an lo ana in ta inane na wa. Agod Anut san taun ninen o buk en ibol dak, ilon lo ta imado na wa.

²⁰ Tamol mel en fidian ninedi wo ibol ilasa den, gamu igo ibol, “Rumok nunon, nai milaen tiap nupalu saltik on a.”

Rumok. O Tubun ak Jesus, on palu!

²¹ Tubun ak Jesus inanen ilo panek an Anut anen tamolpein fidian mi ida ka amado wa. Rumok.

Anut san bilalug foun
The New Testament in the Takia Language of Papua
New Guinea
Nupela Testamen long tokples Takia long Niugini

Copyright © 1999 The Bible Society of Papua New Guinea

© Faith Comes by Hearing

Language: Takia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-12-11

PDF generated using Haiola and XeLaTeX on 22 Feb 2024 from source files dated 31 Aug 2023

757b3e4e-2023-5b45-893a-ee9294ddeb9d